

Xojoṇ carta-la San Pablo xi kiskiì-la xita naxandá-la Cristo xi títsajna Roma

Kó tsò Pablo nga síhixat'aà jñà xita
naxandá-la Cristo xi títsajna Roma

1 ¹Jè xojoṇ carta jè, 'aán tìkjiì-nò xi Pablo 'mì-na xi chí'nda-la Jesucristo ma, xi xó kiichja-na Nainá nga 'an tsibíxáya-na kò xó kitjaàjiin-na nga 'an sika'bísoàn 'én ndaà-la Nainá.

²It'aà ts'e 'én koi, Nainá jye k'oas'ín kitsjaà tso'ba nga tisa kjòtseé, koni s'ín tíchja Xojoṇ Tsjeè-la xi kiskiì xita xi kiichja ngajo-la Nainá. ³Nga ya tíchja it'aà ts'e Ki'ndí-la, jè Na'èn-ná Jesucristo xi jè otíxoma-ná. Koni xita isò'nde, yaá inchrobàt'aà-ne tje-la xitaxá ítjòn David. ⁴K'e nga jaáya-la it'aà ts'e kjoabiyaà, Jesucristo, k'oagá s'ín kiyaxkon-la nga Ki'ndí-la Nainá-né xi tse nga'ño tjín-la koni s'ín ndaà síkíchiya-ná jè Inima Tsjeè-la Nainá xi sítsjeè-ná. ⁵It'aà ts'e Jesucristo, kitjoé-na kjondaà nga 'an tsibíxáya-na nga kènojmíya-la 'én ndaà-la jñà xita naxandá xi tjín nga tíjtsa isò'nde nga kàtasíkitasòn kò kàtakjeiín-la it'aà ts'e Cristo, mé-ne nga jeya kíjna-ne Cristo. ⁶Tìkkoá jñò, xó kinokjoà-nò nga xita-la Cristo k'oín-nò.

⁷Tìkjiì-nò ngats'ioè xi titsajnaà Roma xi matsjakeè-nò Nainá nga tìkoá xó kinokjoà-nò nga xita tsjeè-la koma.

Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Mé-ne mejèn-la kjoì Roma jè Pablo

⁸Xi mats'ia-ne, it'aà ts'e Jesucristo tsjaà-la kjondaà Nainá xi it'aà tsajòn, koi kjoa-la nga xki xi ján naxandá xi tjín nga

tíjtsa isò'nde, na'ya-nò nga ndaà mokjeiín-nò it'aà ts'e Cristo. ⁹It'aà ts'e Nainá xi 'an sixá-la nga tíjngod takoàn nga sika'biá 'én ndaà-la xi kjoa ts'e Ki'ndí-la, jè tíbeè nga nachrjein nchijòn síkítsjeèn-nò k'e nga chjàt'aà-la. ¹⁰K'e nga bitsi'ba-la Nainá, k'oaá s'ín síjét'aà-la tsà ikon xi tsò nga chaán tsjá'nde-na nga kíjkon-nò. ¹¹Tikoaá mejèn-na skoexkon-nò mé-ne nga tsja chiba-nò kjohítsjeèn ts'e iníma-ná mé-ne nga isa kixi kítsajna-nò. ¹²Jè xi tixan-nò nga ngàsòn k'oi-lá nga'nó xinguiá it'aà ts'e kjoa xi mokjeiín-ná.

¹³Ndsè, tichja, mejèn-na nga kàtasijiín-nò nga kjòtseeé tjín-ne nga kíjkon-nò tanga skanda i'ndeí mì tà jngod kjoa bíchjoà ikòn-na. Xi kjohítsjeèn ts'an, jè xi mejèn-na nga sixáko-nò jñò, koni s'ín kisixá ñánda nga xìn naxandá mé-ne nga tíkoa skoeè-na kjondaà-la xá-na xi 'an s'iaàn it'aà tsajòn. ¹⁴Tjínè-na nga kokodya-la ngats'iì xita xi 'én griego chja ko xi mìkii chja, xita xi tjín-la kjoachjine ko xi tsjín-la. ¹⁵K'oaá ma-ne nga 'nó mejèn-na nga tíkoa kichjáyajiín-nò jè 'én ndaà-la Nainá xi kjoa ts'e Cristo, jñò xi titsajnaà naxandá Roma.

Mé nga'nó xi tjín-la 'én ndaà-la Nainá xi kjoa ts'e Cristo

¹⁶Mìkii masobà-na it'aà ts'e 'én ndaà-la Nainá xi kjoa ts'e Cristo, nga nga'nó-la Nainá-né. Jè 'én xi ma-la síkítsajnandeí xita kjoa ts'e jé, ngats'iì xita xi mokjeiín-la it'aà ts'e, mats'iaiko-ne jñà xi xita judío ko tíkoa xi mìtsà xita judío. ¹⁷Jñà 'én ndaà-la Nainá xi kjoa ts'e Cristo okó-ná kós'ín s'ín Nainá nga síkixi xita. Tà jè-né nga mokjeiín-la it'aà ts'e Cristo mé-ne nga isa ndaà kòkjeiín-la. K'oaá s'ín tíchja Xojon-la Nainá nga tsò: “Jè xi xita kixi, it'aà ts'e kjoa xi mokjeiín-la kíjnakon-ne.”

Jé xi tjín-la xita isò'nde

¹⁸Nga jè Nainá skanda ján ngajmiù tíhokó kjoajti-la it'aà ts'e xita xi mìkii beèxkón ko xi ch'o s'ín. Jè kjohítsjeèn ch'o xi tjín-la mì kì tsjá'nde-la nga kjoétjò xi kjoakixi. ¹⁹Jè kjoa xi 'ya-la it'aà ts'e Nainá, ndaà tíjiín-la jñà xita koi, nga tijè-ne Nainá tíhokó-ne. ²⁰Nga jñà kjoa ts'e Nainá xi mìkii tsejèn, ndaà tíyaxkon-la kóni nga tisa kisindaà isò'nde. Yaxkoón-la nga tjín-la nga'nó Nainá nita mé nachrjein-ne nga tà jè tajngod xi Nainá 'mì. Kjoa koi tí'yaá-la it'aà ts'e tsojmi xi tsibíndaà Nainá. K'oaá ma-ne nga jñà xita mì kì koma kinchako yijo-la

nga kítso: “Mìkiì tǐjìin-na tsà tǐjna Nainá.” ²¹ Jǎà xítà nas'ín tǐjìin-là nga tǐjn Nainá xi tsibíndaà isò'nde, tanga mìkiì jeya kisikǐjna, nì mìkiì kitsjaà-là kjondaà. Tǎ saá tà koí 'nó ndaà kisis'in-là kjohítsjeèn xi nímé chjí-là. Kjohítsjeèn tájaà-là kisijñò-là. ²² Xi kjohítsjeèn ts'e, xítà chjineé kitsò-là yijo-là; tanga mìtsà kixi kjoa, xítà nchikón-né. ²³ Kisikǐjnat'aàxìn Nainá xi jeya tǐjna xi mìkiì fehet'aà nachrjein-là; tǎ saá koi kijtseèxkón isén ts'e xítà xi fehet'aà nachrjein-là; skanda jǎà isén-là cho xi tǐjmajiìn isén kijtseèxkón, ko isén-là cho xi ñijòn ma ndsoko ko isén-là ye.

²⁴ Koí kjoa-là nga kitsjeiìn takòn Nainá nga taxki kàtas'ín nga kàtas'ín nítà mé kjoa chìnga xi bitjokàjìin inìma-là. K'oaá ma-ne nga tsohótsji-là kjoa sobà yijo-là koni s'ín kisikò xíkǐjn. ²⁵ Kisikǐjatǐyaá-là kjoa kixi-là Nainá; 'én ndiso kiskoé. Jǎà kijtseèxkón koa jǎà kisìtsjako tsojmì xi jè Nainá tsibíndaà. Mìtsà jè kijtseèxkón koa kisìtsjako Nainá xi tsibíndaà tsojmì. Nainá kàtayaxkón nítà mé nachrjein-ne, k'oas'ín kàtama.

²⁶ Koí kjoa-là nga kitsjeiìn takòn Nainá nga ko s'ín kàtas'ín-ko yijo-là kjoa sobà xi ch'o tǐjn. Jǎà íchjín kisikǐjatǐyaá-là koni s'ín mochjeén x'in; tǐjn íchjín xi tǐjǎà xíkǐjn kiskoé-ne. ²⁷ K'oaá tis'ín kis'iìn íchjá, kitsjeiìn takòn-né koni s'ín mochjeén íchjín. Tǐjn íchjá xi 'nó kisaseèn-là nga tì x'in xíkǐjn tsoyijòko-ne. Tsohótsji-là kjoa sobà yijo-là. K'oaá ma-ne nga kjo'in kis'e-là xi tì yijo ts'e-ne koni s'ín ok'in-là kjoa ch'o xi kis'iìn.

²⁸ Xítà koi, mìkiì kisikítsjeèn tsà mochjeén-né nga skoexkon Nainá; k'oaá ma-ne nga kitsjeiìn takòn Nainá nga kàtasíkjeén kjohítsjeèn-là xi nì mée chjí-là mé-ne nga k'oas'ín kàtas'ín-ne kjoa xi mìkiì ok'in-là. ²⁹ Xítà koi, yaá tǐjìin yije inìma-là ngats'iì kjoa xi ch'o tǐjn koni: kjoa chijngui, kjoa ts'en, kjoa tse mejèn, kjoa toòn, kjoaxìtakòn, kjoa nga ma-là sík'en xítà, kjoa xi kjaán-kjoò, kjoa konachan, kjoa xi ch'o s'ín, kjoa 'én ndiso; ³⁰ nga chjajno-là xíkǐjn; nga sǐtikeè Nainá; ochrjengui xíkǐjn; 'nga ikon; ndaà síkǐjna yijo-là; síkítsjeèn nga mejèn-là isa ch'o tǐjn kjoa xi s'iìn; mìkiì 'nchréñijon-là xítà jchínga-là; ³¹ mìkiì machiya-là; mìkiì síkítasòn 'én xi chja; mìkiì beètjò xítà xíkǐjn; tsjìn-là kjoa nìchàat'aà; koa tsjìn-là kjoahimatakòn. ³² Jǎà xítà koi, ndaà tǐjìin-là nga k'oaá s'ín tsjá okixi Nainá: ngats'iì xi k'oa tǐjn kjoa xi s'ín, ok'ín-là nga kiyá. Tanga mìkiì majngoò

ikon nga tà jñà xi k'oas'ín, skanda tìkoáá matsja-là k'e nga k'oà tìs'ín xìtā xi kj'eíí.

Nainá, mé xi tsjá-là xìtā xi ndaà s'ín kō xi ch'o s'ín

2 ¹K'oáá ma-ne, ngaji, nìtā yá xìtā-ne jì, nga jé onè-là xinguii, mìkiì kōma kōsìkoiì yìjo-lè nga nguixkōn Nainá. K'e nga jé tìbìnè-là xìtā xinguii, tìkoáá ngaji, tìjì tìbìnè-là jé yìjo-lè nga k'oà tìs'ín 'nì. ²Tānga 'ya-ná nga kixì s'ín Nainá k'e nga tsjá-là kjo'in jñà xìtā xi kōa tìjín jé xi ótsji. ³Ngaji xi kjo'in bìnè-là xìtā xi kj'eíí, ¿mé-ne kōa s'ín nìkìtsjeèn-ne nga jchat'aà-lè kjo'in xi tsjá Nainá? Nga jì k'oáá tìs'ín 'nì. ⁴¿A mì tìjìin-lè nga nachrjekàngui jè kjōndaà-là Nainá nga tìjín-là kjojetakòn kōa tìjín-là kjoatseja? ¿A mì tìjìin-lè nga jè kjōndaà-là Nainá tíkoña-né nga sìkájnoi jé-lè nga mì tì jé kìnchátsji-ne? ⁵Nga tájaàjìin tìjín inìma-lè nga mìkiì nìkájnoi jé-lè, isaá tse kjo'in tìbìnè-là yìjo-lè xi tsjá-lè Nainá jè nachrjein k'e nga kjoíko kjoajti-là nga jcha-là kós'ín kixì koiìndaàjìin Nainá nga tsjá-là kjo'in jñà xìtā. ⁶Nainá tsjá-là chjì-là mé kjoa xi kis'iìn nga jngod òjngod xìtā. ⁷Tsjá-là kjoabinachon nìtā mé nachrjein-ne jñà xìtā xi nchihótsji kjoajeya, kō nchihótsji nga jchaxkón, kō nchihótsji nga kìtsajnakon nìtā mé nachrjein-ne ján ngajmì. Koií kjoa-là nga ndaà tìjín kjoa xi nchis'ín nga kjit'aà nachrjein. ⁸Tānga Nainá nga kō kjoajti-là tsjá-là kjo'in jñà xìtā xi kondra fi-là nga mìkiì 'nchréñijon xi kjoa kixì. Tà kjoa nchikón fitjìngui-là. ⁹Tseé kjoa s'e-là kō tseé kjo'in s'e-là ngats'iì xìtā xi ch'o s'ín, mats'iako ítjòn-ne jñà xìtā judío, tìkoáá kō xi taxkì xìtā xi mìtsà xìtā judío. ¹⁰Tānga jñà xìtā xi ndaà s'ín, tjoé-là kjoajeya, ndaà jchaxkón, tìkoáá s'eé-là kjoa'nchán inìma-là, mats'iako ítjòn-ne jñà xìtā judío, tìkoáá kō xi taxkì xìtā xi mìtsà xìtā judío.

¹¹Nainá mìkiì faájiìn nìtā yá xìtā-ne, tà ngàsòn fìkō yìje. ¹²Ngats'iì jñà xìtā xi mìkiì tìjìin-là kó tsò kjotíxoma xi kiskìì Moisés, k'e nga jé ótsji, chija-né nas'ín mìkiì kijtsee kjotíxoma-là Moisés. Kōa jñà xìtā xi ndaà tìjìin-là kjotíxoma-là Moisés, k'e nga jé ótsji, k'oáá s'ín kojtsō koni s'ín tíchjā xi tìjè-ne kjotíxoma. ¹³Jñà xìtā xi tà 'nchré-là kjotíxoma xi kiskìì Moisés, mìtsà jñà xi xìtā kixì nga nguixkōn Nainá. Jñà-né xi xìtā kixì xi síkitasòn. ¹⁴K'e nga jñà xi taxkì xìtā xi mìkiì

tjiin-la kós'in tichja kjotíxoma-la Moisés, sà k'oaá tà yaá nchrobájiin iníma-la nga k'oas'in s'in koni tsò kjotíxoma-la Moisés, yaá 'ya-la nga tikoa tjiin iníma-la kjotíxoma xi ts'e nas'in tsjin-la ts'e Moisés. ¹⁵K'e nga ndaà s'in yaá 'ya-la nga tjiin iníma-la kjoa xi síjé kjotíxoma-la Moisés; jè iníma-la okò kjoa xi ndaà tjin ko xi mikii ndaà tjin; tijè-ne kjohísjeèn-la sà k'oaá óngui ko sà k'oaá osiko. ¹⁶K'oaá s'in koma jè nchrjein k'e nga Nainá koindaajiin ngats'iì jé xi tji'ma-la xita jjiin iníma-la; it'aà ts'e Jesucristo sindaajiin, koni tsò 'én ndaà-la Nainá xi kjoa ts'e Cristo xi 'an chjàya.

¹⁷Ngaji xi xita judío 'mì-lè; jè ma'nót'aà takoìn kjotíxoma xi kiskii Moisés; 'ngaá ma takoìn it'aà ts'e Nainá nga si tsiji-né; ¹⁸'ya-né mé xi mejèn-la Nainá nga sikitasoìn; ma-lè chjaajiin mé kjoa xi nguì ndaà tjin koni s'in okóya-lè Kjotíxoma; ¹⁹k'oaá s'in níkijsiin nga tijnogò takoìn nga jì okòd-la ndiyá kixi xita xi mikii machiya-la nga tichjoà xkon ko k'oaá ma-lè nga jì nihiseèn-la xi tjiñò kjohísjeèn-la. ²⁰Jì, k'oaá s'in níkijsiin nga ma-lè okoðya-la xi taxki xita xi tsjin-la kjohísjeèn; nga maestro 'mì-lè ts'e xita xi chiba ma-la it'aà ts'e Nainá; nga tjin-lè kjoa chjine ko kjoa kixi xi okó-lè it'aà ts'e Kjotíxoma. ²¹Jì xi ma-lè okoðya-la xita xi kjeíí, ¿mé-ne mikii okoðya-la xi tì yijo tsiji-ne? Jì k'oaá s'in nokjoàyi nga mikii ma sichijé; jì, ¿mé-ne nichijé-ne? ²²Jì, k'oaá si nga mikii ndaà tjin nga kjoa chijngui s'iin xita; jì, ¿mé-ne nga k'oa tís'in 'nè-ne? Jì, k'oaá si nga jtichii xkòsòn; ¿mé-ne nga ingo bitjaàs'en-ne nga nichijí tsojmì-la xkòsòn? ²³Jì, 'ngaá takoìn nga ndaà tjiin-lè kjoa ts'e kjotíxoma tanga, ¿a mìtsà tìnchrjekàngui Nainá nga mikii níkitasòn-la koni s'in tichja kjotíxoma? ²⁴K'oaá s'in tichja Xojon-la Nainá nga tsò: “Kjoa tsajòn-nò xi xita judío 'mì-nò nga chjajno-la Nainá jñà xi taxki xita.”

²⁵Tsà ndaà sikitasoìn kjotíxoma xi kiskii Moisés, jè kjoa ts'e circuncisión nga tjit'aà chiba-lè, chjí-la-né; tanga tsà mikii sikitasoìn, k'oaá ngaya-la koni tsà mikii tjit'aà chiba-lè. ²⁶Jñà xi mìtsà xita judío, nas'in mikii tjit'aà chiba-la koni xita judío, tanga tsà kixi síkitasòn kjotíxoma ts'e Moisés, Nainá skoétjò-né koni tsà tjit'aà chiba-la. ²⁷Jñà xita xi síkitasòn kjotíxoma ts'e Moisés, nas'in mikii tjit'aà chiba-la yijo-la, jñà koindaajiin-nò nga mikii níkitasòn nas'in tjit'aà chiba-nò, nas'in tjin-nò xojon ts'e kjotíxoma-la Nainá. ²⁸Jngò xi xita

judío, mìtsà tà jè nga ndaà 'ya-là kjoa xi s'ín; koa jngoò xit̃a xi t̃jít'aà ch̃iba-là kjoa ts'e circuncisión, mìtsà tà jè xi mochjeén nga t̃jít'aà ch̃iba-là isò'nga yijo-là. ²⁹Jè xi nguì xit̃a judío, jè xi ch̃jí-là koni s'ín t̃jín ijìin inima-là. Ko jè xi nguì t̃jít'aà ch̃iba-là, jè xi ch̃jí-là koni s'ín t̃jít'aà ch̃iba-là ya ijìin inima-là. Kjoa koi, mìtsà ts'e k̃jot̃íxoma xi xojon t̃jít'aà; ts'e'é Inima Tsjeè-là Nainá. J̃nà xi k'oas'ín síkitasòn, Nainá ndaà ch̃ja xi it'aà ts'e, nas'ín mìkiì ndaà ch̃ja xit̃a xi k̃j'eíí.

Mé kjoa xi 'ñó ch̃jí-là it'aà ts'e xit̃a judío

3 ¹Tsà k'oaá s'ín t̃jín, ¿mé k̃jondaà xi isa tse t̃jín-là nga xit̃a judío 'mì? Ko ¿mé ch̃jí-là nga t̃jít'aà ch̃iba-là? ²Kjìn skoya ch̃jí-là. Jè xi t̃jina ít̃jòn, jè-né nga j̃nà xit̃a judío k̃jòngatsja 'én-là Nainá. ³J̃nà xit̃a judío, nas'ín t̃jín i'nga xi mìkiì síkitasòn 'én xi k̃jòngatsja, ¿a koma sik̃jat̃jìya-là kjoakixi-là Nainá nga mìkiì k̃itasòn koni s'ín kitsjaà tso'ba? ⁴Majìn, mìkiì koma. Nainá, xit̃a kixi-né, nas'ín xit̃a ndiso ngats'iì xit̃a xi t̃jín isò'nde; koni s'ín t̃íchja xojon nga tsò:

Mé-ne nga kàta'ya-là nga kixi kjoa 'én xi nokjoi s̃ikijne-né k'e nga yá xi k̃hòngui-lè.

⁵T̃jín i'nga xit̃a xi tsò: K'e nga ch'o 'nè, isaá ndaà 'ya-là kjoakixi-là Nainá. Tsà k'oas'ín t̃jín, ¿kó kixoán? ¿A kixón-ná nga mì kjoa kixi tís'ín Nainá nga k̃jò'in tsjá-ná? (Tsà k̃os'ín kixoán, jngoò k̃joh̃ítsjeèn-là xi tax̃k̃i xit̃a t̃itsanikjeén.) ⁶Tanga majìn, mì k'oaá s'ín t̃jín. Tsà mìtsà kixi s'ín Nainá nga k̃jò'in tsjá-ná, ¿kós'ín koma k̃oiindaàjìin-là xit̃a isò'nde?

⁷T̃ikoaá tsà k'oa k̃itso xit̃a koi: “Tanga tsà k̃joandiso-na okó nga jè kjoa kixi-là Nainá isa jeya k̃ijna, ¿mé-ne k'oas'ín t̃isinè-na nga xit̃a jé t̃iyatakòn-na?” ⁸T̃ikoaá-ne ch'o s'eén mé-ne nga k̃atasakó-isa-ná k̃jondaà-là Nainá. T̃jín xit̃a xi kotsò nga k'oaá t̃jín 'én xi okoòya; jè xi mejèn-là nga ch'o s̃ik̃ijna-na. J̃nà xit̃a xi kotsò, ok'ín-là nga t̃joé-là k̃jò'in xi Nainá tsjá.

Mé jé xi t̃jín-là ngats'iì xit̃a

⁹¿Kó s'ín ñik̃ítsjeèn? J̃nà xi xit̃a judío 'mì-ná, ¿a isaá ndaà xit̃aá koni j̃nà xit̃a xi k̃j'eíí? Majìn, jyeé k'oaá kixan-nò, tà ngàsòn jé t̃itsajnaj̃nàá ngats'iaá xi xit̃a judío 'mì-ná ko xi tax̃k̃i xit̃a. ¹⁰Koni s'ín t̃íchja Xojon-là Nainá nga tsò:

Nijngoò xit̃a t̃jín xi xit̃a kixi, ñi tsà tà jngoò.

¹¹ Nijngodò t́jín xi machiya-la,
nijngodò t́jín xi ótsji Nainá.

¹² Ngats'iì xítà, saá xìn ndiyá kii; ngats'iì nímée chjí-la kjoa xi
s'ín;

nijngodò xi ndaà s'ín, ni tsà tà jngodò.

¹³ Naxájta-la, k'oaá kjoàn koni ngajo-la mik'en k'e nga
táx'ajto;

nijen-la nguì 'én ndisoó chja;

'én xi chja, k'oaá गया-la koni tsà xán-la ye.

¹⁴ Chjajno-la xítà kò nguì koi 'én chja xi 'on ma-la inima-ná.

¹⁵ Mikii koña kjoa, nitoón sík'en xítà.

¹⁶ Nítà ñánda nga fi, síhima kò síkjehesko xítà xi kj'eíí.

¹⁷ Mikii beèxkon ndiyá ñánda t́jín kjoa'nchán.

¹⁸ Mikii tsakjón-keè Nainá it'aà ts'e kjoa xi s'ín.

¹⁹ Jyeé 'yaá nga ngats'iì 'én xi t́jít'aà kjotíxoma ts'e Moisés, jñá chja-la ngats'iì xítà xi ya fit'aà-la, mé-ne nga ngats'iì xítà, mikii koma kichja nga kinchako yijo-la nga nguixkon Nainá; ngats'iì xítà xi t́jín isò'nde koìindaajìin-la Nainá nga jcha-la nga jé t́jín-la. ²⁰ Nijngodò xítà xi kixi kájna nga nguixkon Nainá tà koi kjoa-la nga ndaà tísíkitasòn Kjotíxoma ts'e Moisés. Nga jè Kjotíxoma, tà k'oaá s'ín mochjeén nga bénojmiya-ná nga jé t́jín-ná.

Kó síko-ná Nainá nga kixi kitsajnaá nguixkon jè

²¹ Tanga i'ndeí, Nainá okó-ná kós'ín s'ín Nainá nga xítà kixi beètakòn-ná. Kò mìtsà kjoa ts'e Kjotíxoma nga bitasòn. Jñá xojon jchínga ts'e kjotíxoma-la Nainá kò ts'e xítà xi kiichja ngajo-la Nainá k'oaá tís'ín bénojmiya-ná, ²² nga jñá xítà k'e nga mokjeíin-la it'aà ts'e Cristo, kixií bitsajna nguixkon Nainá. K'oaá s'ín síko yije kóhotjín xi mokjeíin-la. Nga ngats'iì xítà ngásòn jé t́jín-la, ²³ nga ngásòn ótsji jé-né; kjìin títajnat'aàxìn-la Nainá ñánda nga jeya t́jna. ²⁴ Tanga Nainá, nga ndaà xítà, kitsjaà kjotjò-ná kjondaà-la mé-ne nga kixi kitsajnaá nguixkon jè. Jè Jesucristo tsibíchjítjì ngajo-ná jé-ná mé-ne nga kitsajnandeíí-ná xi kjoa ts'e jé. ²⁵ Nainá kitsjaà ki'ndí-la koni jngodò kjotjò xi faáxìn jé-ná nga nguixkon Nainá k'e nga mokjeíin-ná it'aà ts'e Jesucristo, nga jè tsibíxteèn jní-la k'e nga k'en. Nainá k'oaá s'ín okóya-ná kós'ín t́jín kjoakixi-la. Koií kjoa-la nga ngasa kjòtseé, Nainá, tíkoña kjoa-né, mikii

n̄iton kitsjaà-là kjo'in x̄ita koni s'ín ok'in-là jé xi tsohótsji.

²⁶ Tanga i'ndēi t'í'ya-là nga it'aà ts'e Jesucristo tísindaàjiin-là x̄ita j̄nà kjoa-là jé xi kisichroba mé-ne nga kàta'ya-là Nainá nga x̄ita kixi-né k̄o t̄ikoaá t̄ijè-ne Nainá xi kixi síkítsajna x̄ita xi mokjeiín-là it'aà ts'e Jesús.

²⁷ ¿A 'ngaá koma takoán nga kixi titsajnaá nguixk̄on Nainá? Maj̄in, mikii 'nga koma takoán. Nga mitsà koi kjoa-là nga kjotíxoma níkitasoán. Jè-né nga mokjeiín-ná it'aà ts'e Jesús nga kixi síkítsajna-ná Nainá. ²⁸ K'oaá tsòya-ne ngats'iì kjoa koi nga Nainá síkixi x̄ita k'e nga mokjeiín-là it'aà ts'e Jesús; mitsà koi nga kjotíxoma ts'e Moisés síkitasòn.

²⁹ ¿A tà ts'eé xi x̄ita judío Nainá? ¿A mitsà t̄ikoa ts'e xi tax̄ki x̄ita? Kjoa kixi-né, t̄ikoaá ts'e-né xi tax̄ki x̄ita xi mitsà x̄ita judío. ³⁰ Nainá, tà jngod̄ ma xi kixi síkítsajna ngats'iì x̄ita k'e nga mokjeiín-là it'aà ts'e Jesús. Ngásòn síko j̄nà x̄ita judío xi t̄jít'aà ch̄iba-là k̄o xi tax̄ki x̄ita xi mikii t̄jít'aà ch̄iba-là. ³¹ Jè kjoa nga mokjeiín-ná it'aà ts'e Jesucristo, ¿a t̄íchahingui-né kjoa ts'e Kjotíxoma? Maj̄in, mitsà t̄íchahingui; ta saá tímajngod̄-ne koni jè xá xi t̄jín-là.

Abraham, mé-ne kixi tsibijna-ne nga nguixk̄on Nainá

4 ¹ ¿Kó kixoán? ¿Mé kjoa kixi xi kisakò-là na'èn-jchá-kjiin-ná Abraham nga kixi tsibijna nguixk̄on Nainá?

² Na'èn-jchá-ná Abraham, tsà koií-la kjoa-là nga ndaà xá xi kis'iin nga kixi tsibijna nguixk̄on Nainá, ok'ín-là nga jeya siikíjna yijo-là, tanga maj̄in nga nguixk̄on Nainá. ³ Nga k'oaá s'ín t̄íchja Xojon jchínga-là Nainá nga tsò: “Abraham, jè-né nga kòkjeiín-là it'aà ts'e Nainá; k'oaá ma-ne nga kiskoétjò Nainá nga x̄ita kixi kitsò-là.” ⁴ Jngod̄ x̄ita xi síxá, jè ton xi tjoé-là, mitsà tà kjotjò tjoé-là; jè ch̄j-là nga síxá. ⁵ Tanga jè x̄ita xi mitsà xá-là ma'nót'aà takòn, tanga mokjeiín-là it'aà ts'e Nainá xi kixi síkítsajna x̄ita xi jé t̄jín-là, x̄ita jè, Nainá k'oaá s'ín skoétjò nga x̄ita kixi tsò-là. ⁶ Jè x̄itaxá ítjòn xi ki'mì David k'oaá t̄is'ín kiichja nga tsja s'e-là x̄ita xi Nainá kjoétjò nga x̄ita kixi tsò-là; Nainá mì t̄i kindā s'ín-ne n̄ita mé xi s'ín. ⁷ David kitsò:

Mé tà ndaà-là j̄nà x̄ita xi jye kichàat'aà-là kjoa ch'o-là k̄o xi jye t̄jtsa'ma jé-là.

⁸ Mé ta ndaà-là j̄nà x̄ita xi mì t̄i kindā s'ín-ne Nainá kjoa ts'e jé-là.

⁹Jè kjondaà jè, ¿a tà ts'eé xita judío xi tjit'aà chiba-la? ¿A xi tikoáá ts'e-né xi taxki xita xi mikii tjit'aà chiba-la? Jye okixan nga jè xita jchínga Abraham, k'e nga kòkjeín-la it'aà ts'e Nainá, kiskoétjò-né nga xita kixi kitsò-la. ¹⁰¿Kós'ín komà nga kiskoétjò Nainá Abraham nga xita kixi kitsò-la? ¿A k'e-né nga jye tjit'aà chiba-la? ¿A xi k'e-né nga tikj'eè tjit'aà chiba-la? Majìn, k'e-né nga tikj'eè tjit'aà chiba-la. ¹¹Abraham, k'e nga jye kiskoétjò Nainá nga xita kixi kitsò-la, iskaán kisit'aà chiba-la koni jngod chiba xi okó nga jye xita kixi nga kòkjeín-la it'aà ts'e Nainá k'e nga tikj'eè tjit'aà chiba-la. K'oaá komà-ne nga xita jchínga kitsò-la Abraham ngats'ii xita xi mokjeín-la it'aà ts'e Nainá nas'ín mikii tjit'aà chiba-la. ¹²Abraham, tikoáá xita jchínga-la-né jñà xita judío xi tjit'aà chiba-la, tanga mìtsà tà koií kjoa-la nga tjit'aà chiba-la, tikoáá koi-né nga ya tjímatjìngui-la nga mokjeín-la it'aà ts'e Nainá, koni s'ín kòkjeín-la Abraham k'e nga tikj'eè tjit'aà chiba-la.

¹³Nainá, k'oaá s'ín kitsjaà-la tso'ba Abraham ko ngats'ii xita tje-la, nga jè kongatsja isò'nde; mìtsà koi kjoa-la nga Kjotíxoma kisikitasòn, jè-né nga kòkjeín-la koni s'ín kiichja Nainá, k'oaá ma-ne nga xita kixi kitsò-la. ¹⁴Tsà tà jñà tjoé-la kjondaà xita xi síkitasòn Kjotíxoma, tsà k'oaá s'ín tjín kjoa, nímé-là hjí-la nga mokjeín-ná it'aà ts'e Nainá; tikoáá mì-là kii kítasòn koni s'ín kitsjaà tso'ba Nainá. ¹⁵K'e nga tjín Kjotíxoma, kjo'ín sinè-ná; tanga tsà tsjìn kjotíxoma, nímé tjín xi kotonè-la kjotíxoma.

¹⁶Jñà xita, nga mokjeín-la it'aà ts'e Nainá tjoé-la kjondaà koni s'ín kitsjaà-la tso'ba Nainá jè Abram. Nainá tsjá kjotjò kjondaà koi mé-ne nga jcha-ná nga kixi kjoa nga kítasòn it'aà ts'e ngats'ii tje-la Abraham. Mìtsà tà jñà tjoé-la xita judío xi tje-la Abraham nga tjín-la kjotíxoma; tikoáá tjoé-la jñà xita xi mìtsà xita judío xi tikoáá tje-la Abraham ma koií kjoa-la nga mokjeín-la koni s'ín kòkjeín-la Abraham. K'oaá ma-ne nga jè Abraham, xita jchínga-ná ma ngats'iaá ¹⁷nga nguixkon Nainá. Koni s'ín tíchja Xojon-la Nainá nga tsò: “Kjìn naxandá xita xi jye kisingatsja-lè xi xita jchínga tsò-lè.” Abraham, kòkjeín-la it'aà ts'e Nainá xi ma-la síkjaáya-la xita xi jye k'en xi tikoá tsjá 'én-la koni tsà jye tsitasòn kjoa xi kj'eè bitasòn.

¹⁸Xita jchínga Abraham kòkjeín-la koni kitsò-la Nainá; kiskoñá kjoa-né nas'ín mikii tjíin-la kós'ín koma nga kítasòn. K'oaá s'ín komà nga kjìn naxandá xi xita jchínga tsò-la, koni

s'ín kitsjaà-la tso'ba Nainá nga kitsò-la: “K'oaá s'ín kjìn jchán koma tje-lè.” ¹⁹Abraham, mìkì kjòhindaà koni s'ín kòkjeiín-la it'aà ts'e Nainá, nas'ín kos'ín beè-la ikon nga mì tì mé chjí-la yijo-la nga jye 'nó xitá jchínga; jyeé kjomeè jngoò sìndo nó tjin-la; Sara xi chjoón-la, tikoáá chjoón 'ndi-né; mì tì kii koma s'e-la ixti. ²⁰Abraham, mìtsà jò tsi'beé-la ikon koni s'ín mokjeiín-la 'én xi kitsjaà-la Nainá. Tà isaá 'nó tsi'beé-la ikon nga ndaà kòkjeiín-la. 'Nó jeya kisikíjna Nainá. ²¹Abraham, nguì ndaà tijnogoò ikon nga Nainá tjin-la nga'nó nga komaá-la sìikitason yije kóhotjin kjoa koni s'ín kitsjaà-la tso'ba. ²²K'oaá ma-ne Nainá, k'e nga kijtsee nga ndaà mokjeiín-la Abraham, kiskoétjò nga xitá kixi kitsò-la.

²³Mìtsà tà it'aà ts'e Abraham kitjei xojon jè nga Nainá kiskoétjò nga xitá kixi tsò-la. ²⁴Tikoáá it'aà tsajan kitjei nga Nainá skoétjò-ná nga ngason xitá kixi kitso-ná koi kjoa-la nga mokjeiín-ná it'aà ts'e Nainá, jè xi kisikjaáya-la Na'èn-ná Jesucristo it'aà ts'e kjoabiyaà. ²⁵Kjòngatsja xitá nga kisik'en Jesús jè ngatji-la jé-ná; tikoáá jaáya-la mé-ne nga kixi kitsajnaá nguixkon Nainá.

Mé kjondaà xi sakó-ná nga jye xitá kixi tsò-ná Nainá

5 ¹K'e nga jye xitá kixi 'mì-ná nga mokjeiín-ná it'aà ts'e Nainá, jyeé 'nchán titsajnaakoáá Nainá it'aà ts'e Na'èn-ná Jesucristo. ²Jè Cristo tsjá-ná nga s'e-ná kjondaà jè, nga mokjeiín-ná it'aà ts'e. Jè kjondaà jè, 'nó ndaà tjiin inima-ná; matsjaá-la inima-ná nga chiñà kjoáá nga tikoá s'e-ná kjoajeya-la Nainá. ³Mìtsà tà koi kjoa nga matsja-ná, tikoáá matsja-ná k'e nga mé kjo'in xi otojñaá. K'e nga kjo'in otojñaá, yaá sakó-ná nga'nó nga tseejta s'eén inima-ná. ⁴K'e nga tseejta s'eén inima-ná, yaá sakó-ná nga ndaà kitjoáá; tsà nga ndaà kitjoáá, tikoáá yaá sakó-ná nga skóna kjoa inima-ná kjondaà xi tsjá Nainá. ⁵Jè kjoa xi chiñá-lá nga tijnogoò takoán, mìkì masobà-ná nga mìkì kitasòn; jè Nainá jyeé ndaà kisikíjnajin inima-ná kjotjòcha-la it'aà ts'e Inima Tsjeè-la Nainá xi kitsjaà-ná.

⁶K'e nga kichóya nachrjein, Cristo, k'en ngajo-ná jñá xi xitá jé 'mì-ná, koií kjoa-la nga tsjin-ná nga'nó nga ma bitjokájñaá jé-ná. ⁷Mi-là yá xitá tjin xi kiyátji ngajo-la jngoò xitá kixi, tanga tsà koi nachrjein-la tsà tjin jngoò xi ko'nó ikon nga

kiyátjì ngajo-la jngoò xi 'nó ndaà x̄ita. ⁸Tanga jè Nainá okó-ná nga 'nó tsjakèè-ná nga jè Cristo k'en ngajo-ná, k'e nga tákò x̄ita jé 'mi-ná. ⁹I'ndeì nga jye x̄ita kixì tsò-ná Nainá nga jè Cristo tsibíxteèn jní-la k'e nga k'en ngajo-ná, isaá 'nó tíkixì kjoa nga it'aà ts'e Cristo kitjokàjñá kjo'in jè nachrjein k'e nga sìikasén kjoiti-la Nainá. ¹⁰K'e nga kondra titsajna-lá Nainá, jè Ki'ndí-la kisìkijne 'nchán kjoa k'e nga k'en. I'ndeì, k'e nga jye ndaà chibà-ná, isaá 'nó tjíkixì kjoa nga kitjokàjñá kjo'in it'aà ts'e Cristo nga jè tijnakon-né. ¹¹Mitsà tà jñà kjoa koi, tikoáá 'nó matsja-ná it'aà ts'e Nainá koni s'ín kisikò-ná it'aà ts'e Na'èn-ná Jesucristo nga it'aà ts'e Cristo 'nchán titsajnaakoá Nainá nga jye kichibàndaà-aná.

¹²K'e nga jahas'en jé isò'nde, jngoò x̄ita xi ki'mì Adán tsohótsji jé, ikjoàn k'en; k'oaá s'ín komà nga kjòts'ia nga biyaà yije kóhotjín x̄ita, koií kjoa-la nga jé ótsji yije kóhotjín. ¹³K'e nga tikj'eè tjoé-la Kjotíxoma Moisés, x̄ita xi tjin isò'nde jyeé tjin yije-la jé. Tanga mìkiì ma kindá jé-la k'e nga tsjin kjotíxoma. ¹⁴Tjen-ne nachrjein ts'e Adán skanda ts'e Moisés, tjinè-la nga kiyá yije x̄ita kóhotjín nas'ín mì k'oaá tjin jé xi tsohótsji koni kis'iìn Adán nga kisikatonè-la okixì xi kitsjaà-la Nainá. Adán, jè ngaya-la [Cristo] xi iskan j'iì.

¹⁵Tanga jé xi tsohótsji Adán, mìkiì mangásòn koni jè kjondaà xi Nainá tsjá; nga tà jè ngatjì-la jé xi tsohótsji xi tà jngoò x̄ita, k'oaá ma-ne nga kjìn x̄ita biyaà; tanga isaá 'nó tse kjondaà tjin-la Nainá nga kjìn x̄ita machikon-t'in kjotjò xi tsjá Nainá it'aà ts'e xi tà jngoò x̄ita xi 'mì Jesucristo. ¹⁶Jé xi tsohótsji xi tà jngoò x̄ita, mìkiì mangásòn koni jè kjondaà xi Nainá tsjá. K'e nga kisakò jé ítjòn, Nainá kitsjaà okixì nga tsibinè-la kjo'in ngats'iì x̄ita. Tanga k'e nga jye kjìn jé tsohótsji x̄ita, j'iì kjondaà-la Nainá nga kixì kítsajna x̄ita nguixkon Nainá. ¹⁷Jè ngatjì-la jé-la xi tà jngoò x̄ita, tjinè-la nga kiyá x̄ita. Tanga i'ndeì, isaá 'nó tjíkixì kjoa nga it'aà ts'e xi tà jngoò x̄ita xi 'mì Jesucristo, tj'i'nde-la nga jeya kítsajnakon jñà x̄ita xi 'nó tse kjondaà-la Nainá kjoé, kò xi 'nó tse kjotjò tjoé-la nga kixì kítsajna nguixkon Nainá.

¹⁸Jè kjoa-la jé xi tsohótsji xi tà jngoò x̄ita kisinè-la kjo'in ngats'iì x̄ita, tanga jè kjoa kixì xi kis'iìn Jesucristo tikoáá kixì kisikítsajna ngats'iì x̄ita nga kítsajnakon nguixkon Nainá. ¹⁹Jè kjoa-la nga mìkiì kiì'nchréñjon-la Nainá xi tà jngoò x̄ita xi 'mì

Adán, k'oaá ma-ne nga kjin xita kisakò jé-la. Tanga jè kjoa-la nga kii'nchréñijon-la Nainá xi tà jngod xita xi 'mì Jesucristo, kjin xita xi kixi kítsajna nga nguixkon Nainá.

²⁰J'i Kjotixoma-la Moisés mé-ne nga ndaà ki'ya-la nga isa 'ño isa 'ño tís'e jé; tanga k'e nga isa tse jé tísakó, isaá 'ño tse kjondaà-la Nainá j'i. ²¹Nga sa íjtòn, jè kjoa ts'e jé tsatixoma-la xita, mé-ne nga kisakò-la kjoabiyaà xita; tanga i'ndei, k'oaá tís'in kàtatixoma kjondaà-la Nainá k'e nga kixi síkítsajna xita nga nguixkon Nainá mé-ne nga s'e-la kjoabinachon nita mé nachrjein-ne xi it'aà ts'e Na'èn-ná Jesucristo.

**Mé-ne nga jè kjoa ts'e jé, mì tì mé nga'ño
tjín-la nga jè kotixoma-ná**

6 ¹¿Kó kixoán? ¿A ndaà tjín nga kinchátsji-jé-isa mé-ne nga isa tse kjondaà tsjá-ne Nainá? ²Majìn, mì kii tì k'oa s'en-ná. Jyeé titsajnat'aaxìn-lá kjoa ts'e jé koni tsà jye k'eén xi it'aà ts'e; mì tì kii koma ya kítsajnajiìn-isaá kjoa ts'e jé. ³¿A mìtsà jye tjíiìn-nò k'e nga komà bautizar it'aà ts'e Cristo ngats'iaá nga tikoá ya titsakjodkoá k'e nga k'en? ⁴K'e nga ma bautizar xita, k'oaá s'in ngaya-la koni tsà ya sihijiìn-t'aà-là Cristo k'e nga k'en. Koni s'in jaáya-la Cristo it'aà ts'e nga'ño-lá Nainá xi 'ño jeya tjína, k'oaá tís'in mochjeén nga kos'in sijchá yijo-ná nga kijnakon xitse ijngod k'aá.

⁵Koni s'in titsakjodkoá Cristo k'e nga k'en, jná k'oaá tís'in kjoaáya-ná koni s'in jaáya-la jè. ⁶Tjiiìn-ná nga jè kjoa jchínga-ná koni s'in ki'né nga isa kjotseé, yaá kisit'aà krò-la Cristo mé-ne nga kàtachija-ne nga'ño-la yijo jé-ná nga mì tì jè kjotixoma-isa-ná. ⁷Jngod xita xi jye k'en, jyeé tjnandeí kjoa ts'e jé. ⁸Nga ya k'en-koaá Cristo, mokjeiín-ná nga tikoá ya kítsajnakoá. ⁹Ya-ná k'e nga jaáya-la Cristo k'e nga k'en, nì tì jngod nachrjein kiyá ijngod k'a-ne. Mì tì mé nga'ño tjín-la kjoabiyaà nga jè kotixoma-la. ¹⁰K'e nga k'en Cristo, jngod k'a k'en xi kjoa ts'e jé-ná; i'ndei nga ijngod k'a tjínakon-né koi kjoa tjínakon-ne nga jeya síkíjna Nainá. ¹¹Jñò, k'oaá tís'in tikítsjeèn koni tsà jye k'eèn xi kjoa ts'e jé; titsajnakon-nò xi kjoa ts'e Nainá nga ya titsajnakoo Na'èn-ná Jesucristo.

¹²Koif kjoa-la, mì tì kii bi'nde-là yijo jé-nò nga jè kjoa ts'e jé kotixoma-nò k'e nga kjo'ño s'in-nò nga nìkitasòn-là kjoa xi ch'o tjín xi síjé yijo-nò. ¹³Kì ya nìngatsja yijo-nò kjoa ts'e

jé nga jè jé síkjeén nga ch'o 'nè, tã saá jè Nainá tìngatsja yijo-nò koni jngodò xitã xi jye jaáya-la it'aà ts'e kjoabiyaà. Nainá tìngatsja yijo-nò nga kàtasíkjeén kjoa xi kixi tjin. ¹⁴Kjoa ts'e jé, mì tì mé nga'nó tjin-la nga jè kotixoma-nò nga mìtsà kjoa ts'e kjoatixoma-la Moisés titsajnajñò; kjondaà-la Nainá titsajnajñò.

¹⁵¿Kó bixoán? ¿A ndaà tjin nga kinchátsji jé isaá nga kjondaà-la Nainá titsajnajñaá nga mìtsà kjoa ts'e kjoatixoma titsajnajñaá? Majìn, mìkii ndaà tjin. ¹⁶Ndaà tjiin-nò tsà ya sngatsja yijo-nò ts'e xitã xi bitje chi'nda nga jè nìkitasòn-là, chi'nda-la komaà ts'e xitã jè. Kjo'nó tjin-ne nga jè sikitason-là. K'oaá s'in tjin, tsà chi'nda-la jé komaà nga jè sikitason-là, kiyá-nò; tanga tsà chi'nda-la Nainá komaà nga jè sikitason-là, kixi kitsajnaà nguixkon jè. ¹⁷Jñò, nga isa kjótseé, k'oaá s'in kinìkitasòn-là kjoa ts'e jé koni tsà jngodò chi'nda, tanga i'ndeí, ndaà chji-la Nainá nga kò inima-nò ndaà nìkitasòn koni s'in nguì ndaà tjin 'én kixi xi kis'enojmi-nò. ¹⁸I'ndeí jyeé titsajnadeí-là kjoa ts'e jé; chi'nda ts'e kjoakixi-nò; tjinè-nò nga sikitason koni s'in síjé kjoakixi. ¹⁹Koi 'én tìchjàkò-nò xi mìtsà 'in chja koií kjoa-la nga indaà tjin takòn; mìkii ndaà machiya-nò kjoa ts'e Nainá. Koni s'in ki'nè nga isa kjótseé nga ya kinìngatsja yijo-nò it'aà ts'e ngats'iì kjoach'o xi tjin nga jè tsatixoma-nò koni xitã chi'nda; i'ndeí k'oaá tìs'in tìngatsja yijo-nò it'aà ts'e kjoa kixi mé-ne jè kjoa kixi kàtatixoma-nò koni chi'nda xi tsjeé tìtsajna nga nguixkon Nainá.

²⁰K'e nga kjoa ts'e chi'nda-la jé titsajnajñò, mìkii tìtsanìkitasòn-là kjoakixi-la Nainá. ²¹Tanga, ¿mé xi kisakò-nò kjoa ts'e jé? I'ndeí tà masobà-nò kjoa koi; tà yaá fiko-ná nándã tjin kjoabiyaà. ²²I'ndeí nga jye titsajnadeí-là xi kjoa ts'e jé, chi'nda-la Nainá ma; kjondaà xi sakó-nò jè-né nga tsjeé tìtsajnaà nga nguixkon Nainá. Xi fehet'aà-ne, s'e-nò kjoabinachon nita mé nachrjein-ne. ²³Chji xi tjin-la kjoa ts'e jé, kjoabiyaà-né. Tanga kjotjò xi tsjá Nainá, kjoabinachon-né nita mé nachrjein-ne nga ya tìtsajna k'oaá Cristo Jesús xi Na'èn-ná ma.

Kó s'in ma fehet'aà nga'nó-la jè kjoatixoma

7 ¹Jñò, xi 'ndseé chibà, tìchjàkò-nò xi jyeé tjiin-nò kós'in tìchja kjoatixoma; 'ya-nò nga tjin-la nga'nó jè kjoatixoma kós'in otixoma-la xitã k'e nga tìtsajnakon-isa skanda k'e nga

kiyá. ²K'oaá ngaya-la jngoò chjoón xi tjin-la x'in, k'oaá tsò kjotíxoma nga mìkiì koma tsjín xíkjín k'e nga tákó títsajnakon ingajò. Tanga tsà jè x'in kiyá, jè chjoón, jye tijnandeí it'aà ts'e kjotíxoma xi ts'e kjoabixan. ³Jè chjoón, k'e nga tsà tákó tijnakon x'in-la, tsà k'jeí x'in kixan-ko, kjoa chijnguí tís'in; tanga tsà jye k'en x'in-la, jè chjoón, jyeé tijnandeí xi kjoa ts'e kjotíxoma jè; komaá kixan-ko ijngoò k'a-ne xi k'jeí x'in. Mì tì kjoa chijnguí tís'in-ne.

⁴Jñò ndí 'ndsè, k'e nga k'en-kjoòkoò Cristo, yaá k'en it'aà ts'e nga'nó-la kjotíxoma, mé-ne nga ya kinókjoa-nò it'aà ts'e Cristo xi jye jaáya-la ts'e kjoabiyaà nga k'oas'in kàta'ya-la it'aà tsajan jè kjondaà xi sasén-la Nainá. ⁵K'e nga tisa ya tjaájnaá kjoa xi tjin isò'nde, jè kjotíxoma tsibít'in-ná mé-ne nga jñà kjoa ch'o xi s'jé yijo-ná, isa 'nó ch'o kisixájiìn yijo-ná; k'oaá komà-ne nga kisakò-ná kjoabiyaà. ⁶Tanga i'ndeí jyeé titsajnandeí-lá kjoa ts'e kjotíxoma. Jyeé k'eén it'aà ts'e kjoa xi bít'aà'nó-ná, mé-ne nga koma sixá-lá Nainá xi kjoa xitse koni s'in okóya-ná Injma Tsjeè-la Nainá. Mìtsà k'oas'in sixá-lá koni s'in tjin kjoa jhínga xi tjit'aà xojon.

⁷¿Kó kixoán xi kjoa ts'e kjotíxoma? ¿A ch'o tjin? ¿A kjoa ts'e jé-né? Majìn, ndaà tjin. Tanga 'an, tsà mìkiì kijtseèxkoan kjoa ts'e kjotíxoma, tikoáà mì-là kiì kijtseè kjoa ts'e jé. Mì-là kiì kisijiìn-na nga mìkiì ndaà tjin nga 'an fahajiìn-na tsojmì xi mìtsà ts'an, tsà jè kjotíxoma mì k'oaá s'in benojmì nga tsò: “Kì jì nìkjaajiìn tsojmì xi mìtsà tsiji.” ⁸Kjoa ts'e jé, yaá kisakò-la nga'nó it'aà ts'e kjotíxoma; k'oaá komà-ne nga isa 'nó jahajiìn-na tsojmì xi mìtsà ts'an. Tanga tsà tsjìn kjotíxoma, tsjìn-la nga'nó kjoa ts'e jé. ⁹K'e nga sa kjòtseé, k'jeè kiì bexkoan kjotíxoma. Tanga k'e nga kijtseèxkoan kjotíxoma, kjoa ts'e jé, isaá ndaà kis'e-la nga'nó; kjoabiyaà kisakò-na. ¹⁰Kjoa ts'e kjotíxoma, tjinè-la nga kjoabinachon tsjána, tanga tà saá kjoa biyaà kitsjaà-na. ¹¹Kjoa ts'e jé, yaá kisakò-la nga'nó it'aà ts'e kjotíxoma nga kiskoðnaxan-na, k'oa kisik'en-na.

¹²K'oaá s'in tjin nga jè Kjoatíxoma, tsjeè-né; koni s'in otíxoma jñà 'én xi tjit'aà, tsjeè-né, kixi-né, koa ndaà-né. ¹³¿Kó bixón? ¿A jè kjoa ts'e kjotíxoma xi ndaà tjin xi kisik'en-na? Majìn, mìtsà koi kjoa-la. Kjoa ts'e jé-né. K'oaá s'in ki'ya-la nga kixi kjoa nga jé-né. It'aà ts'e kjotíxoma xi ndaà tjin, jè kjoa ts'e jé kisakò-la nga'nó nga kisik'en-na, mé-ne nga ki'ya-la it'aà ts'e kjotíxoma nga 'nó ch'o tjin xi kjoa ts'e jé.

Kó tsò x̄it̄a xi ot̄ixoma-l̄a kjoa ts'e jé

¹⁴Kjoa ts'e k̄jot̄ixoma, 'ya-ná nga k̄joh̄ítsjeèn ts'e In̄im̄a Tsjeè-l̄a Nainá; t̄anga 'an, yijo jé tsohoya; yijo-na yá k̄jòngatsja kjoa ts'e jé nga jè ot̄ixoma-na. ¹⁵Mik̄iì f̄iya-na mé kjoa xi s'iaàn. Kjoa xi ndaà t̄jín xi mejèn-na nga s'iaàn mik̄iì koa s'iaàn. Tà saá j̄nà kjoa xi mik̄iì sasén-na sikitasoàn. ¹⁶K'e nga k'oa s'iaàn j̄nà kjoa xi mik̄iì mejèn-na, k'oaá xan nga t̄j̄ikixi kjoa nga ndaà t̄jín koni s'ín t̄íchja k̄jot̄ixoma. ¹⁷K'e nga k'oa s'iaàn nga otsjià jé, mìtsà 'an xi k'oa s'iaàn, jè kjoa ts'e jé xi t̄j̄iìn-na b̄ít'in-na. ¹⁸'An xi x̄it̄a isò'nde 'm̄i-na, be-ná nga mik̄iì ndaà t̄jín kjoa xi t̄j̄iìn yijo-na. Mejèn-na nga ndaà s'iaàn, t̄anga mik̄iì sakó-na kó s'ín s'iaàn kjoa xi ndaà t̄jín. ¹⁹K'e nga mejèn-na ndaà s'iaàn, mik̄iì sikitasoàn; tà saá koi sikitasoàn kjoa xi ch'o t̄jín xi majìn-na nga koa s'iaàn. ²⁰K'e nga k'oas'ín sikitasoàn kjoa xi ch'o t̄jín xi majìn-na nga koa s'iaàn, mìtsà 'an xi k'oa s'iaàn, jè kjoa ts'e jé xi t̄j̄najiìn-na xi k'oas'ín.

²¹Jngod̄ kjoa matsji-na nas'ín mejèn-na nga ndaà s'iaàn, tà saá tà koi sakó-na kjoa xi ch'o t̄jín. ²²Xi ij̄iìn in̄im̄a-na matsja-na it'aà ts'e K̄jot̄ixoma-l̄a Nainá. ²³Tanga t̄jín ij̄ngod̄ kjoa xi t̄ísíx̄aj̄iìn yijo-na xi mik̄iì tsj̄á'nde-na nga ndaà s'iaàn; jè kjoa ts'e jé kjaán-kjoð k̄joh̄ítsjeèn-na xi mejèn-l̄a nga ndaà s'iaàn. Kjoa ts'e jé xi t̄ísíx̄aj̄iìn yijo-na síkijne-na nga ch'o s'iaàn.

²⁴Im̄a xó-na 'an; çyá xi s̄ik̄ijnandej̄i-na it'aà ts'e yijo jé-na xi kjoabiyaà t̄jín-l̄a? ²⁵Ndaà ch̄j̄i-l̄a Nainá nga it'aà ts'e Na'èn-ná Jesucristo síkijnandej̄i-ná kjoa ts'e jé.

Nga j̄nà 'én xi kot̄ixan-nò nga 'an, ya ij̄iìn k̄joh̄ítsjeèn-na mejèn-na sikitasoàn k̄jot̄ixoma-l̄a Nainá, t̄anga ya ij̄iìn yijo jé-na, tà saá kjoa ts'e jé sikitasoàn.

Mé k̄jondaà xi sakó-ná k'e nga k'oas'ín t̄itsan̄ijchá yijo-ná koni s'ín mejèn-l̄a In̄im̄a Tsjeè-l̄a Nainá

8 ¹Tanga i'nde, j̄nà x̄it̄a xi ya t̄itsajnakjoðko Cristo, mì t̄j̄ mé kjo'in s̄inè-l̄a, j̄nà x̄it̄a xi mì k'oaá s'ín nchis̄jchá yijo-l̄a koni t̄jín jé xi s̄jé yijo-l̄a; tà saá k'oaá s'ín nchis̄jchá yijo-l̄a koni s'ín mejèn-l̄a In̄im̄a Tsjeè-l̄a Nainá. ²Jè nga'ñó-l̄a In̄im̄a Tsjeè-l̄a Nainá xi síkítsajnakon-ná nga ya t̄itsajnakjoðkoaá Cristo; ko tijè-ne nga'ñó xi

kisikítsajnandeíj-ná it'aà ts'e nga'ñó-la kjoa ts'e jé ko it'aà ts'e kjoabiyaà. ³Kjotíxoma ts'e Moisés mikìl kichìkjoa-la nga síkítsajnandeíj-ná it'aà ts'e jé, nga tsjìn-la nga'ñó, koi kjoa-la nga jè yijo-ná síjé jé xi tjín isò'nde. Tanga Nainá kichikjoaá-la nga kisikasén Ki'ndí-la koni jngodò xi xita isò'nde xi yijo kis'e-la koni jná xi xita jé 'mì-ná. Ki'ndí-la kitsjaà kjotjò yijo-la nga k'en xi kjoa ts'e jé-ná. Nainá k'oaá s'ín kis'iin nga jngodò k'a kisikjehet'aà kjoa ts'e jé xi tjín-la yijo-ná. ⁴Nainá k'oaá s'ín kis'iin mé-ne nga it'aà tsaján kàtitasòn-ne jè kjoa kixi xi ts'e kjotíxoma, jná xi mì k'oaá s'ín titsanjchá yijo-ná koni tjín jé xi síjé yijo-ná, nga k'oas'ín titsanjchá yijo-ná koni s'ín mejèn-la Inima Tsjeè-la Nainá.

⁵Jná xita xi k'oa s'ín koni tjín xi síjé yijo-la, k'oaá tjín kjoa xi nchisíkítsjeèn; tanga jná xi k'oa s'ín koni s'ín tjín xi síjé Inima Tsjeè-la Nainá, k'oaá tjín kjoa xi nchisíkítsjeèn. ⁶Jná xita xi k'oas'ín nchisíkítsjeèn koni tjín xi mejèn-la yijo-la, kjoabiyaà tjín-la. Tanga jná xita xi k'oas'ín nchisíkítsjeèn koni s'ín mejèn-la Inima Tsjeè-la Nainá, tjín-la kjoabinachon ko kjoa'nchán. ⁷Xita xi tà koi kjoa nchisíkítsjeèn koni tjín kjoa ch'o xi síjé yijo-la, kondra ts'e Nainá-né koi kjoa-la nga mikìl síkitasòn ko mikìl chíkjoa-la nga síkitasòn kjotíxoma-la Nainá. ⁸Jná xita xi k'oas'ín s'ín koni tjín xi síjé yijo-la, mikìl ma-la s'ín koni s'ín sasén-la Nainá.

⁹Tanga jndò, mì tì k'oaá 'nè-nò koni tjín xi síjé yijo-nò; k'oaá s'ín titsa'nè koni tjín xi síjé Inima Tsjeè-la Nainá, nga jè tijnajiin inima tsajòn Inima Tsjeè-la Nainá. Jná xita xi tsjìn-la Inima Tsjeè-la Nainá xi kitsjaà Cristo, mìtsà xita ts'e Cristo. ¹⁰Tanga tsà yaá tijnajiin inima tsajòn Cristo, inima tsajòn tijnakon-né nga xita kixi 'mì-nò nga nguixkon Nainá, nas'ín k'oas'ín tjinè-la nga kiyá yijo-nò xi kjoa ts'e jé. ¹¹Jè Nainá xi kisikjaáya-la Jesucristo it'aà ts'e kjoabiyaà, tsà ya tijnajiin inima-nò jè Inima Tsjeè-la, k'oaá tis'ín sìkítsajnakon ijngodò k'a yijo-nò xi kjoa ts'e kjoabiyaà it'aà ts'e nga'ñó-la Inima Tsjeè-la Nainá xi tijnajiin inima tsajòn.

¹²K'oaá ma-ne, jná xi 'ndsee chibá, tjna jngodò xi tjinè-ná nga síkitasòn-lá, tanga mìtsà jè yijo-ná síkitasòn-lá; mì tì koi k'oas'ín s'en-ná koni tjín kjoa ch'o xi síjé yijo-ná. ¹³Tsà táko k'oaá s'ín s'een nga ya onguít'aà-là kjoa xi ch'o mejèn-la yijo-nò, kiyá-nò. Tanga tsà koi'nde-là Inima Tsjeè-la Nainá

nga jngod̄ k'a s̄ikijne-l̄a kjoa xi ch'o mejèn-l̄a yijo-nò, kitsajnakon-nò.

¹⁴Jñà xit̄a xi jè Inim̄a Tsjeè-l̄a Nainá okó-l̄a ndiyá, jñà-né xi ixti-l̄a Nainá 'mì. ¹⁵Jè Inim̄a Tsjeè xi kitsjaà-nò Nainá mìtsà taxki inim̄a im̄a xi kjo'ñó s'ín-nò koni jngod̄ ch'i'nda xi ts'e jé nga ma-l̄a bíxkón-nò; ta saá jè Inim̄a xi kitsjaà-ná Nainá skoétjò-ná nga ixti-l̄a komaá, tijè-ne Inim̄a Tsjeè-l̄a Nainá bénojmiya-ná nga ma nokjoà-lá Nainá nga Ndí Apa 'mì-lá. ¹⁶Jè Inim̄a Tsjeè-l̄a Nainá tsjá kixi-l̄a 'én inim̄a tsján nga ixti-l̄a Nainá 'mì-ná. ¹⁷K'e nga jye ixti-l̄a maá, tikoáá tsján-ná kjotjò-l̄a Nainá xi jye k'oas'ín kitsjaà tso'ba nga tsjá-ná; tañaá tjoékjod̄-ná kò Cristo nga tikoá kò jè titsanìkjaán kjo'in mé-ne nga jeya kitsajnako-ná Cristo.

¹⁸'An, k'oaá xan nga kixi kjoa, koni tjín kjo'in xi titsanìkjaán i'ndeì mikiì mangásòn koni tjín kjoajeya-l̄a Nainá xi s'e-ná k'e nga koma iskan. ¹⁹Jñà tsojmì xi Nainá tsibíndaà, 'ñó nchikoña kjoa nga mejèn-l̄a skoe nachrjein k'e nga Nainá jngod̄ k'a ndaà kòkò kó kjoàn xi ixti-l̄a ma. ²⁰Jñà tsojmì xi tsibíndaà Nainá, jngod̄ k'a its'oòn-jìin koni s'ín tjínè-l̄a nga kochjeén nga sa ítjòn; mìtsà kjotsja ts'e isò'nde nga k'oas'ín komàt'in; koi-né nga jè Nainá k'oaá s'ín kiskodsòn-l̄a; tanga i'ndeì jñà xi tsibíndaà Nainá nchikoñaá-l̄a ²¹nga kjoìi nachrjein k'e nga tikoá kitsajnandeìi xi tsibíndaà Nainá nga mì tì kii kìts'ón-jìin-ne; Nainá jeya s̄ikìtsajnandeìi ijngod̄ k'a-ne koni s'ín s̄iko ixti-l̄a. ²²'Ya-ná ngats'iì xi Nainá tsibíndaà, skanda i'ndeì, nchitsiné-né, kjo'in nchisíkjeiín koni jngod̄ chjoón xi ki'ndí tí'beé. ²³Mìtsà tà koi xi tjín isò'nde xi tsiné; tikoáá jñà xi jye tjín-ná Inim̄a Tsjeè-l̄a Nainá koni jngod̄ kjondaà xi tjen kitjoé ítjòn-ná, tikoáá tsiné-ná nga kjo'in titsanìkjaán nga titsachiñá-lá nga 'ñó mejèn-ná nga skoétjò-ná Nainá nga jngod̄ k'a ya kitsajnakoáá koni ixti-l̄a maá; yijo-ná kíjnandeìi-ne it'aà ts'e kjoa xi síkìts'ón-ná. ²⁴Nga jye titsajnandiaá, i'ndeì jè titsachiñá-lá nga jngod̄ k'a kàtitasòn. Tanga tsà tsejèn tíjna xi chiñá-lá mikiì ma chiñá-lá. ¿Yá xi koña-l̄a xi tsejèn tíjna? ²⁵Tanga tsà jè chiñá-lá xi mikiì tsejèn tíjna, tafì tafì chíñakjoa-lá.

²⁶K'oaá tìs'ín s'ín jè Inim̄a Tsjeè-l̄a Nainá k'e nga indaàjìin tjín inim̄a-ná síchját'aà-ná. K'e nga mikiì ma-ná kó s'ín sijét'aà-lá Nainá k'e nga bìtsi'ba-lá, tijè-ne Inim̄a Tsjeè-l̄a

Nainá bítsi'batjì-ná, ñimé 'én xi tsejèn chja, ñi ìtsé fiya-ná kó tsòya-ne. ²⁷Jè Nainá xi ma-la bíxkejiìn inìma-ná, tíjiìn-la mé xi tíbítsjeèn-la jè Inìma Tsjeè-la. K'e nga bítsi'batjì xita tsjeè-la Nainá k'oaá s'ín síjét'aà-la koni s'ín mejèn-la Nainá.

**Ñimé xi koma kochrjet'aàxìn-ná kjoatjòcha-la
Nainá xi jye tjín-ná it'aà ts'e Cristo Jesús**

²⁸Tíjiìn-ná nga it'aà ts'e jñà xita xi tjòkèè beè Nainá, ngats'iì kjoa xi mat'in, Nainá k'oaá s'ín síkjeén xi kjondaà ts'e xita. K'oaá s'ín síko jñà xita xi xó jè kiìchja-la koni s'ín mejèn-la, ²⁹jñà xita xi jye tíjiìn-la nga tisa tàts'en-la kjoa nga ixti-la koma; tìkoaá k'oaá s'ín kiskoòsòn-la nga ngásòn kjoàn koma koni kji Ki'ndí-la mé-ne nga jè Cristo Ki'ndítjòn koma koa kjin koma xita xíkjin xi 'ndse. ³⁰Nainá nga k'oaá s'ín kiskoòsòn-la it'aà ts'e xita koi, tìkoaá xó kiìchja-la, jñà xi xó kiìchja-la tìkoaá kixií kisikítsajna, jñà xi kixií kisikítsajna tìkoaá jeya kisikítsajna.

³¹¿Mé xi kixoán it'aà ts'e kjoa koi? Nga Nainá tíjnakò-ná, nijngod xita kondra-ná siìkijne-ná. ³²Nainá mìkiì 'on komà-la, nga kitsjaà kjotjò Ki'ndí-la it'aà tsajan ngats'iaá skanda kjoabiyaà. ¿A mìtsà tìkoa tsjá kjotjò-ná ngayije nga ko Cristo? ³³¿Yá xi koma kohòngui-ná jñà xi Nainá xó jaèjiìn-ná? Mì yá xi koma kohòngui-ná nga jé Nainá jye kixií kisikítsajna-ná. ³⁴¿Yá xi koiì'nè-ná kjo'in? Nga jé Cristo Jesús k'en ngajo-ná, tìkoa jaáya-la kjoa ts'e kjoabiyaà. Yaá tíjna it'aà kixií-la Nainá nga tíbítsi'batjì-ná. ³⁵¿Yá xi kochrjet'aàxìn-ná kjoatjòcha-la Cristo? ¿A kjo'in-né? ¿O xi kjoaba-ne? ¿O xi jè-né nga ongatjingui-ná xita? ¿O xi kjoa ts'e kjinchrá-ne? ¿O xi koií-né nga tsjìn-ná nikje xi chíkjá? ¿O xi jè kjoa xi xkón tjín? ¿O xi jè kjoa biyaà nga xita sík'en-ná? Majìn, ñimé kjoa-ne. ³⁶K'oaá s'ín tíchja Xojon-la Nainá nga tsò:

Xi kjoa tsiji kjit'aà nachrjein tjín kjoaxkón nga kiyá-jen, k'oaá s'ín tíyatakòn-najen koni orrè xi tíjndaà nga kiyá. ³⁷Tanga it'aà ts'e ngats'iì kjoa koi, jye tsato titsanìkijne-lá xi it'aà ts'e Cristo xi kjòtsjakeè-ná. ³⁸K'oaá s'ín tíjngod takoán nga nijngod kjoa xi koma kochrjet'aàxìn-ná xi kjoatjòcha-la Nainá, ñi jè kjoa biyaà, ñi kjoabinachon, ñi àkjale, ñi jñà nga'nó xi tjín isò'nde ñi jñà xi tjín ijiìn isén, ñi jñà kjoa xi tjín nachrjein i'ndeì, ñi jñà kjoa xi koma nachrjein xi sa nchrobá,

³⁹ni jè xi isa 'nga, ni jè xi isa nanga, nita mé tsojmi xi Nainá tsibíndaà, nimé xi koma kochrjet'aàxìn-ná kjoatjòcha-là Nainá xi jye tjín-ná it'aà ts'e Cristo Jesús xi Na'èn-ná.

**Mé-ne mikii ijchòtjngui-là kjoa kixi-là
Nainá jñà xita Israel xi xó jaàjiin-ne**

9 ¹Okixií xi xan it'aà ts'e Cristo; mi 'én ndiso chjà; jè Inima Tsjeè-la Nainá síkíchiya-là kjohítsjeèn-na nga tsjá 'én it'aà ts'an, ²nga kjit'aà nachrjein ba tjín-na koa 'on ma-la inima-na, ³it'aà ts'e jñà xita 'ndsè xi xinguiáa ma koi-né nga 'ñó matsjake. 'Ñó mejèn-na nga kátasakó-là kjondaà. Skanda komaá-là kósit'aàxìn-là Cristo tsà k'oas'ín sakò-là kjondaà jñà xita xinguiáa xi ts'e naxandá Israel, tanga mikii tjí'nde-na nga kos'ín s'iaàn. ⁴Nga jñà xita Israel, jè Nainá kiskoétjò nga ixti-là ma, ko yaá ki'ya-là kjoajeya-là Nainá, ko kitjoé-là jñà kjoa xi tsibíndaàjiin-ko, tikoá kitjoé-là kjotíxoma-là Moisés, ko kitjoé-là okixi kós'ín skoexkón Nainá, ko kitjoé-là 'én koni s'ín kitsjaà-là tso'ba Nainá. ⁵Jñà xita Israel yaá inchrobàt'aà-ne ts'e xi 'ñó xita jhínga kjiin xi Nainá xó jaàjiin-ne. Jè Cristo [xi xó kisikasén-ne Nainá] nga xita isò'nde komà, yaá inchrobàt'aà-ne it'aà ts'e xita jhínga koi. Jè Cristo xi Nainá; jè otíxoma yije-là kjoa; jeya kàtìjna nita kjé-ne. K'oas'ín kàtama.

⁶[Nga mìtsà mokjeiín-là ngats'iì xita Israel], mìtsà koi kjoa-là nga jè 'én-la Nainá mikii bitasòn. Koi-né nga it'aà ts'e Nainá, mìtsà ngats'iì xita xi ya nchrobát'aà-ne tje-là Israel nga ngui kixi kjoa nga ya chja-ne. ⁷Nas'ín ya tjen-là it'aà ts'e Abraham, mìtsà ngats'iì nga kitjoé-là kjondaà nga ixti-là ma. Nga k'oaá tsò Xojon-là Nainá: “Jñà xita tje-lè, yaá kjinchrobà-ne it'aà ts'e Isaac.” ⁸Kjoa koi, k'oaá tsòya-ne, nga jñà ixti-là Nainá, mìtsà jè xi chjí-là yá ts'e tje xi nchrobát'aà-ne. Ta jñà-né xi ixti-là Nainá ma jñà xi jye k'oas'ín kitsjaà tso'ba Nainá nga ixti-là koma. Tà jñá-né xi k'oas'ín oxkit'aà nga kixi kjoa nga ngui tje-là Abraham ma. ⁹Nga jè 'én xi Nainá kitsjaà-là tso'ba Abraham, k'oaá tsò: “Jè nó xi sa nchrobá kjoif ijngod k'a-na; jè Sara, ki'ndí s'e jngod-là.”

¹⁰Mìtsà ta jñà kjoa koi xi komà. Tikoáá jè Rebeca kis'e-là ixti'ño xi ts'e Isaac, jè xi xita jhínga-ná ma. ¹¹Nainá k'oaá s'ín kitsjaà tso'ba k'e nga tikj'eè ts'iin jñà ixti'ño nga tikj'eè kii 'ya-là mé kjoa xi s'iin, a jè xi ndaà tjín, o jè xi mikii ndaà

tjín. K'oaá s'ín kjòkixi nga Nainá tjí'nde-la nga kjoaájiin xita koni s'ín jye tjíndaà-la nga kichja-la jñà xita xi jè mejèn-la. Mìtsà kindà s'ín mé xi jye kis'iin xita. ¹²Nainá k'oaá kitsò-la Rebeca: “Jè ti-lè xi jts'ín ítjòn, chi'nda-lá koma jè xi iskan jts'ín.” ¹³K'oaá s'ín tíchja Xojon-la Nainá nga tsò: “Jè Jacob kjòtsjakeè-ná, kò jè Esau kòjtikeè-ná.”

¹⁴¿Mé xi kixoán? Nainá, ¿a mìtsà kjoa kixi xi s'ín? Majìn, mì k'oaá s'ín tjín. ¹⁵Nainá k'oaá kitsò-la Moisés: “Kohimakeè-ná xi 'an mejèn-na nga kohimakeè, skoehima-ná jè xi mejèn-na nga skoehima.” ¹⁶K'oaá s'ín tjín kjoa koi, mìtsà koi nga jñà mejèn-ná nga s'e-ná, ni mìtsà koi nga 'nó binchaatsjiaá; jè Nainá tsjá-la kjondaà-la jñà xita xi jè mejèn-la mahimakeè. ¹⁷K'oaá s'ín tíchja Xojon-la Nainá nga kitsò-la Faraón: “Koií k'oas'ín kisikijna-lè nga xitaxá tijni ya naxandá Egipto mé-ne nga it'aà tsiji kookoaà nga'nó-na tikoá skoexkon-na xita nga tjtsa isò'nde.” ¹⁸K'oaá s'ín s'ín Nainá, tjín-la kjohimatakòn it'aà ts'e xita xi jè mejèn-la; tikoá ma-la sítájaajiin inima-la xita xi jè mejèn-la nga kátasítájaajiin inima-la.

¹⁹Tanga tsà ji k'oa k'oín-ná: “Tsà k'oas'ín s'ín Nainá, ¿mé-ne jé bínè-la jñà xita?, nga ni yá xita xi koma kondra kjoí-la koni s'ín mejèn-la jè.” ²⁰Tanga ji, xi taxki xita-né, ¿yá-né ji, nga Nainá otikjòkoi? Jngodé tjí xi xó kisindaà-ne, ¿a komaá kitso-la jè xi tsibindaà: “Mé-ne k'oas'ín tsibindaà-ná?” ²¹¿A mì tjí'nde-la jè xi ma-la bíndaà tjí ni'nde nga tijè-ne ndási koiindaà jngodé-ne tjí xi tà k'e mochjeén k'e nga tjín s'eí koa koiindaà jngodé xi nachrjein nchijòn mochjeén?

²²Tsà Nainá mejèn-la tsakó kjoajti-la kò nga'nó-la, ¿a ch'o tjín nga kiskodñà kjoa it'aà ts'e xita xi tjoé-la kjo'in kò xi tjínè-la nga kjoehesòn? ²³Mìtsà ch'o tjín; nga koií k'oas'ín kis'iin-ne mé-ne nga ma tsakó kjoajeya-la xi it'aà tsaján nga kjòhmakeè-ná. Nga jè tsibítsajnandaà-ná skanda tisa kjòtseé, mé-ne tikoá s'e-ná kjoajeya-la. ²⁴Nainá k'oaá s'ín xó kiichja-ná. Tjín xita xi ya itjokajiin ts'e xita judío; tikoá tjín xita xi ya itjokajiin ts'e xi taxki xita xi mìtsà xita judío. ²⁵K'oaá s'ín tíchja xojon-la Oseas xita xi kiichja ngajo-la Nainá nga tsò:

Jè xi mìtsà naxandá-na ma nga sa ítjòn, naxandá ts'aán koma;

jè xi mì tjòkeè kijtseè nga sa ítjòn, tjòkeè skoeè.

²⁶Ti ya-ne i'nde ñánda oki'mi-nò:

“Mìtsà naxandá ts'an xan-nò”,

“ixti-la Nainá xi tijnakon” k'oin-nò.

²⁷Isaías, xita xi kiichjaya ngajo-la Nainá, k'oaá ti tsò it'aà ts'e naxandá Israel: “Nas'in kjin jchán ma-ne ixti-la koni tsoimì ts'e ndáchikon, tà chiba ma-ne xi kitjokàjiin kjo'in. ²⁸Nga jè Na'en-ná nitoón siikitasòn jè kjoakixi-la xi jye jè kitsjaà koni s'in tjinè-la jña xita nga tjtisa isò'nde.” ²⁹Koni s'in kitsò Isaías nga tisa ítjòn:

Jè Na'en-ná, xi tse nga'nó tjin-la,

tsà mìkii kisikiningui chiba-ne tje-ná,

jyeé-la kisikjehesòn yije-ná

koni kisikò naxandá Sodoma kò naxandá Gomorra.

³⁰¿Mé xi kixoán? Jña xi mìtsà xita judío, xi mìkii fitjingui-la kjoa kixi, i'nde, jyeé xita kixi-né nga nguixkòn Nainá tà koif kjoa-la nga mokjeín-la it'aà ts'e Nainá. ³¹Tanga jña xita Israel xi fitjingui-la Kjotixoma-la Moisés nga nchihótsji nga kixi kítsajna nguixkòn Nainá mìkii ijchòtjingui-la. ³²¿Mé-ne nga k'oas'in komà-ne? Koi kjoa-la nga mìkii mokjeín-la it'aà ts'e Nainá. Tà k'oaá s'in 'nó tshót'aàhikon nga ndaà tjin kjoa xi kis'iin it'aà ts'e Kjotixoma. K'oaá ma-ne [k'e nga j'iì Cristo] yaá kisatíngui koni jngò Ndajo xi kijnahikòn. ³³Xojon-la Nainá k'oaá s'in tíchja [it'aà ts'e Cristo] nga tsò:

Ya nindoò Sión kijnaá jngoaá ndajo xi kijnahikòn,

jngò Ndajo xi satíngui xita,

tanga jè xi kòkjeín-la it'aà ts'e Ndajo jè mìkii kosobà-la.

Mé xi s'eén nga kítsajnandeí-ná xi kjoa ts'e

jé-ná nga kixi kítsajnaá nguixkòn Nainá

10 ¹Jñò ndí 'ndsè, xi nguì okixi, koif xi 'nó mejèn-la inima-na kò xi 'nó s'jét'aà-la Nainá it'aà ts'e naxandá Israel, nga kàtitsajnandeí kjoa ts'e jé-la. ²An be kixi-ná nga 'nó mejèn-la nga ndaà skoexkón Nainá jña xita Israel, tanga mìkii mangásòn kjohítsjeèn-la koni s'in tjin jè kjohítsjeèn xi nguì kixi tjin. ³Nga mìkii fahas'en-jiin-la nga tà jngò jè Nainá xi ma-la kixi síkítsajna xita. Tà jè xi mejèn-la nga tà jña kixi síkítsajna yijo-la. Majin-la kjoé xi okixi-la Nainá xi ma-la kixi siikijna-ná. ⁴Nga jè Cristo kisikjehet'aà kjoa ts'e kjotixoma mé-ne nga s'e-la kjoa kixi ngats'iì xita xi mokjeín-la it'aà ts'e Nainá.

⁵Jè Moisés, k'oaá s'ín kiskìi ìt'aà ts'e xìt̃a xi mejèn-là kixì kítsajna ìt'aà ts'e kjoṭíxoma nga tsò: “Jè xìt̃a xi sìkítasòn kjoṭíxoma, ìt'aà ts'e kjoṭíxoma kíjnakon-ne.” ⁶Tanga ìt'aà ts'e xìt̃a xi kixì kítsajna k'e nga mokjeíin-là, k'oaá tsò: “Kì k'oaá tsò inìma-lè: ¿Yá xi kjimijìn ngajmìi?” (Én koi tsòyaá-ne nga mejèn-là kjinchrobàjen-ko Cristo.) ⁷Ko, kì k'oaá tsò inìma-lè: “¿Yá xi ma koiis'en-jiìn ì'nde ñánda nchisíkjeíin kjo'in jñà mik'en?” (Én koi tsòyaá-ne nga mejèn-là skímìi'nga ìjngòd k'a-ne Cristo ya ìjiìn-là mik'en.) ⁸Tanga, ¿kó tsò-ìsa 'én-là Moisés? Tsò-ne: “Chrañat'aà tìjna-lè jè 'én, yaá tìjna'a ndsoboi, yaá tìjnajiìn inìma-lè.” K'oaá tsò 'én xi 'an chjaya xi mochjeén nga kòkjeíin-ná. ⁹Tsà ndsoboi kénojmi-ne nga Jesucristo, jè xi Na'è-ná, koà tsà kò inìma-lè kòkjeíin-lè nga Nainá kisìkjaáya-là ìt'aà ts'e kjoàbiyà, kijnandeíí-né xi kjoà ts'e jé-lè. ¹⁰Nga kòò inìma-ná mokjeíin-ná mé-ne nga kixì kítsajnaá nguixkòn Nainá tìkoà kòò ndsobaá bènojmiá nga Jesucristo, jè xi Na'è-ná, mé-ne nga koma kítsajnandeíí-ná xi kjoà ts'e jé-ná.

¹¹K'oa's'ín tìchja Xojon-là Nainá nga tsò: “Ngats'ìi xi kòkjeíin-là ìt'aà ts'e Cristo mìkìi kosobà-là.” ¹²Jñà xìt̃a judío kò xi mìtsà xìt̃a judío, tà ngàsòn-né xi ìt'aà ts'e Nainá; nga tìjè-ne Cristo xi Na'è-ná tsò-là ngats'ìi xìt̃a. Jè kjondaà xi 'ñó tse tìjn-là Cristo, jè tsjá-là ngats'ìi xìt̃a xi chjat'aà-là. ¹³Nga k'oaá tì tsò Xojon-là Nainá: “Ngats'ìi xìt̃a xi kichjat'aà-là Na'è-ná, kítsajnandeíí-né xi kjoà ts'e jé-là.” ¹⁴Tanga mìkìi koma kichjat'aà-là Cristo jè xìt̃a xi kje'è kì mokjeíin-là. Kò mìkìi kòkjeíin-là xìt̃a xi kje'è mé 'én 'nchré ìt'aà ts'e Cristo. Koà mìkìi koma kji'nchré xìt̃a tsà mì yá xìt̃a tìjn xi keènojmi-là ìt'aà ts'e Cristo. ¹⁵Koà jè xìt̃a xi keènojmi 'én, mìkìi koma sìixá tsà mì yá xi sìikasén. K'oa's'ín tìt'aà xojon: “Mé tà ndaà-ne nga k'oa's'ín binchimasòn jñà xìt̃a xi chjaya 'én ndaà-là Nainá xi kjoà ts'e Cristo xi ts'e kjoa'nchán.”

¹⁶Tanga mìtsà tà ngats'ìi xìt̃a Israel kisìkítasòn jè 'én ndaà-là Nainá xi kii'nchré. Nga jè Isafías xìt̃a xi kiichja ngajo-là Nainá, k'oaá kitsò: “Na'è-ná, ¿yá xi kòkjeíin-là 'én xi jìn kinokjoàya-jen?” ¹⁷K'oaá ma-ne, k'e nga mokjeíin-ná, yaá nchrobát'aà-ne k'e nga na'yá-lá 'én. K'oa jñà 'én xi na'yá, 'én ndaà-là Nainá xi kjoà ts'e Cristo-né.

¹⁸Tanga, k'oaá xan: ¿A mìtsà kii'nchré xìt̃a Israel jè 'én ndaà-là Nainá? Jon, kii'nchré-né. Nga k'oaá tsò jè Xojon-là Nainá:

Kijndà isò'nde jyeé tsabísòn 'én-la.

Jyeé ijchò skanda ñanda fehet'aà-ne nangui.

¹⁹Tikoáá xan-ná: jñà xitá Israel, ¿a mì kisijiin-la kjoa koi?

Kisijiin-la. Jè xi tǐjna ítjòn, k'oaá kitsò Moisés:

'An, k'oaá s'ín s'iaàn nga kàtachinicha jñò jngoò naxandá
xi mìtsà naxandá ts'an xan-la.

Kàtamajticha it'aà ts'e naxandá xi chiba kjohítsjeèn tǐjn-la.

²⁰Tikoáá Isaías 'ñó tsi'beé-la ikon nga kiichja 'én-la Nainá nga kitsò:

Kisakò-la jñà xitá xi mìkii 'an tsohótsji-na.

Tsakó-la kjondaà-na jñà xitá xi mìkii 'an kiskònanguiya-na.

²¹Tanga jè Isaías k'oaá s'ín kiskii it'aà ts'e xitá Israel koni s'ín kitsò Nainá: “Nachrjein nchijòn tsijmeé-la ndsaa nga kichjà'nchré-la jngoò naxandá xi kondra kii-la 'én-na nga mì kì kisikitasòn.”

Kjohimatakòn xi tǐjn-la Nainá it'aà ts'e naxandá Israel

11 ¹Aán kjònanguia, jè Nainá, ¿a kitsjeiin takòn naxandá-la Israel? Majìn, mì k'oaá s'ín tǐjn. 'An, tikoáá xitá Israel-ná, tje-laá ma Abraham, xitá xinguiáa ma xi ya nchrobát'aà-ne ts'e Benjamín. ²Nainá mìtsà tsachrjekàngui naxandá-la nga jye tǐjiin-la nga tisa tàts'en-la kjoa nga ixti-la koma. ¿A mì tǐjiin-nò koni tsò Xojon-la Nainá it'aà ts'e Elías nga k'oas'ín chjat'aà-la Nainá xi kondra ts'e Israel? Tsò: ³“Na'èn, jñà xitá-lè xi kiichja ngajo-lè, jyeé kisik'en xitá, koa jñà i'nde tsjeè-lè jyeé kisikits'óna; tà 'an tajngoò tǐjnaa isa, tikoáá mejèn-la sǐik'en-na.” ⁴Tanga k'oaá tsò 'én xi tsjá Nainá: “Majìn, mìtsà tà jǐ tajngoò tǐjni. Itoò jmiù ma-ne xitá xi 'an tǐtsajnatjò-na xi kj'eè tsà ya bincha-xkó'nchit'aà-la xkósòn-la Baal.” ⁵Nachrjein i'ndeí tákó k'oaá s'ín ma, tǐjn isa xitá Israel xi tǐtsajnatjò-la Nainá xi xó jaàjiin-ne xi kjondaà ts'e. ⁶Tsà tà kjondaà ts'eé Nainá nga k'oas'ín jaàjiin xitá, tsòyaá-ne mìtsà koi kjoa-la kjondaà xi kis'iin. Tanga tsà koií kjoa-la kjondaà xi kis'iin, mì-la tsà tǐ kjondaà-la Nainá kjòchjeén-ne nga kitjaàjiin xitá.

⁷¿Kó s'ín tǐjn kjoa? Tsòyaá-ne nga kjín xitá Israel mìkii ijchòtǐngui-la jè kjoa xi tsohótsji. Tanga kis'e i'nga xitá xi xó jaàjiin-ne Nainá xi jye ijchòtǐngui-la. Jñà xitá xi i'nga, 'ñó kjòtájaàjiin inima-la. ⁸K'oaá s'ín tǐjt'aà Xojon-la Nainá nga

tsò: “Nainá, kitsjaà-la nga kisìjñòjìin inìma-la; jñà xkòn mìkiì tsejèn-la, kò líká-la, mìkiì 'nchré skanda nachrjein i'ndeì.” ⁹Jè xitaxá ítjòn David k'oaá ti kitsò:

Jè s'eí xi ochrje, tije kàtama-ne ch'an nga kàtakaàngui,
kàtasiya'nó na'ya,
kò tijñà kàtasatíngui-ne mé-ne nga kàtas'e-la kjo'in.

¹⁰Kàtasichjoà xkòn mé-ne nga mìkiì kotsejèn-la
nga kjit'aà nachrjein kàtamatsit'in ít'sin.

¹¹'An kjònangui-ná, ¿a jngodò k'a chixòt'aà nangui jñà xita Israel k'e nga kisatèngui? Majìn. Mì k'oaá s'ín tjin kjoa. Jè kjoa-la nga mìkiì kisikitasòn jñà xita Israel, jñà kitjoé-la xi mìtsà xita judío nga tsibitsajnandeí xi kjoa ts'e jé-la. K'oaá s'ín komà mé-ne nga jñà xita judío kàtachinì-ne it'aà ts'e kjondaà-la Nainá. ¹²Tsà jñà xita isò'nde kisakò-la kjoanchiná-la Nainá k'e nga jñà xita judío mìkiì kisikitasòn-la Nainá kò kisichijà kjondaà-la, isaá ta 'nó ndaà s'e-la kjoa machikon-t'in jè isò'nde k'e nga jñà xita judío ìjngodò k'a skoé i'nde-la ya nguixkòn Nainá.

¹³Jñò chjàkò-nò xi mìtsà xita judío mì-nò. 'An kisixáya-na nga 'an kichjàjìin-la jñà xi mìtsà xita judío. 'An beèxkón-ná xá xi kits'iì-na. ¹⁴Tsà koií nachrjein-la kochiníi i'nga xita xinguiáa mé-ne nga tikoà koma kítsajnandeí-ne xi kjoa ts'e jé-la. ¹⁵Tsà jñà xita isò'nde kisakò-la kjoa'nchán it'aà ts'e Nainá k'e nga jñà xita judío itjokàngui, isaá tse kjondaà sakò-la jñà xita judío k'e nga skoétjò ìjngodò k'a-ne Nainá. Skanda k'oaá s'ín komat'in koni jngodò xita xi jye k'en kò kjoaáya-la it'aà ts'e kjoabiyaà.

¹⁶Tsà tsjeè niño xi sindaà ítjòn nga kongatsja Nainá, tikoáa tsjeè-né na'yo xi kochjeén nga sindaà niño k'e nga koma iskan. Tsà tsjeè it'aà ts'e Nainá i'ma-la yá, jñà chrja-la tikoáa tsjeè-né.

¹⁷Jñà xita Israel, k'oaá s'ín ngaya-la koni jngodò yá olivo ndaà xi kitiit'aà chrja-la, koa ngaji k'oaá s'ín ngaya-la koni chrja-la yá olivo ijìin ijñá nga ya kisikjoðkoiì ya ngajo-la chrja-la yá olivo ndaà; k'oaá ma-ne nga ya tichjoí jè nga'nó-la i'ma-la yá olivo ndaà. ¹⁸Kì 'nga nikíjni yijo-lè nga ya titsakjoðkoiì chrja-la yá olivo ndaà. Tikítsjiin nga tà kisikjoðkò-nè; mìtsà jì 'biì-la nga'nó jñà i'ma-la yá olivo ndaà, tà saà jì tsjá-lè nga'nó jñà i'ma-la yá olivo ndaà.

¹⁹Jì, kì k'oaá si: “Kitiit'aà chrja-la yá olivo ndaà, nga 'an kisikjoðkooa.” ²⁰Tikítsjiin koií kjoa-la nga mìkiì mokjeíin-la

nga kitiit'aà-ne. Tanga jì koií kjoa-la nga mokjeiín-lè nga ya tijnat'eii. Kì 'ngaá beè-la takoin, tiskón-la Nainá. ²¹Nainá, tsà mikii kitsjaà'nde-la jñà chrja-la jè yá olivo ndaà nga ya kíjnakjoòko tikoáá ngaji tsà mì tì kiì mokjeiín-lè mì tì kiì tsjá'nde-lè nga ya kijnakjoòkoii. ²²Chitsejèn-la Nainá, 'nó ndaà xita tanga tikoáá jè xi mejèn-la nga ndaà kitasòn 'én xi chja. Mikii beè ima jñà xita xi chinchat'aàxìn-la Nainá. Tanga it'aà tsiji títsjá-lè kjondaà. Tà jè xi mochjeén nga k'oas'ín kijni koni s'ín tjín kjondaà xi kitsjaà-lè. Tsà majìn tikoá kotet'aà-lè koni jngoò chrja-la yá. ²³Jñà xita judío xi chrja-la yá xi kitiit'aà, tsà kòkjeiín ijngoò k'a-la, komaá sincháya-ne i'nde-la, nga Nainá tjín-la nga'nó, komaá kíkjoò ijngoò k'a-ne. ²⁴Jì, nga ya kitiit'aà-ne jñà yá olivo ijìn ijñá koá kisikjoòkoii yá olivo ndaà nas'ín mikii ya ok'in-lè. jlsaá tà ndaà ok'in-la nga jñà chrja-la yá olivo xi xó kitjaàjìn-ne nga sincháya ijngoò k'a-ne i'nde-la xi tijè-ne yijo-la yá!

²⁵'Ndsè, mejèn-na nga ndaà kàtasijiìn-nò kjoa'ma koi koni s'ín tjindaà-la Nainá mé-ne nga mì 'nó chjine kijnachrje yijo-nò. Jè kjoa nga tjín i'nga xita Israel xi kjòtájaàjìn inima-la nga mikii mokjeiín-la, tanga skanda k'eé kòkjeiín-la k'e nga jye kòkjeiín yije-la xi mìtsà xita judío. ²⁶K'e nga jye k'oas'ín koma, ngats'iì xita Israel kítsajnandeíí-né xi kjoa ts'e jé-la, koni s'ín tíchja xojon nga tsò:

Yaá nindoò Sión kjinchrobà-ne xi ma-la sikkítsajnandeíí xita Israel xi kjoa ts'e jé-la,

jè xi kjoaáxìn-la jé-la jñà xita tje-la Jacob.

²⁷Jè kjoa xi bìndaàjìn-koaa

k'e nga kjoaáxìn-la jñà jé xi tjín-la.

²⁸Kjoa ts'e 'én ndaà-la Nainá xi kjoa ts'e Cristo, jñà xita judío, kondra-laá ma Nainá mé-ne jñò sakò-nò kjondaà. Tanga jè kjoa nga xó kitjaàjìn-ne xita koi, tákó matsjakeè Nainá nga jye kos'ín kitsjaà-la tso'ba jñà xita jchínga kjìn-la. ²⁹Nainá mikii faáxìn kjotjò xi tsjá, tikoá mikii faáxìn 'én xi chja-ná.

³⁰Jñò, k'oaá tís'ín ki'nè nga sa kjòtseé; mikii kinikitasòn-là Nainá, tanga i'ndeí jyeé kisakò-nò kjohimatakòn, koií ngatjì-la nga mikii kisikitasòn jñà xita judío. ³¹Nachrjein i'ndeí jñà xita judío mikii síkitasòn-la Nainá. Tanga tà koi-né nga jè Nainá tjín-la kjohimatakòn xi it'aà tsajòn mé-ne jñà xita koi tikoáá s'e-la kjohimatakòn ts'e Nainá. ³²Nainá, k'oaá tsò nga ngats'iì

xita judío, ko xi mitsà xita judío, mikii síkitasòn-la nga jè xi mejèn-la Nainá nga ngàsòn ngáya kohimakeè ngats'iì xita.

³³ Mé tà 'nó tse ma kjoanchiná xi tjin-la Nainá, ko 'nó tse kjoachjine tjin-la ko kjohitsjeèn-la! Nijngòd xita xi machiya-la kós'ín kosòn-la k'e nga bíndaàjìin ko kós'ín tjin ndiyá-la.

³⁴ ¿Yá xi beè kós'ín tjin kjohitsjeèn-la Nainá? Mì yá xi koma-la sikkichiya-la Na'èn-ná. ³⁵ ¿Yá xita xi jè kisikiña ítjòn-la xi mochjeén-la Nainá mé-ne nga jè sikkátji ngajo-la? ³⁶ It'aà ts'eé Nainá nchrobát'aà-ne ngats'iì tsojmì xi tjin, tikoa it'aà ts'e-né nga títsakon, ko k'oaá s'ín mochjeén nga jeya kína.

Nainá, kàtas'e-la kjoajeya nita mé nachrjein-ne. K'oas'ín kàtama.

Mé xi s'eén nga tsjeè sijchá yijo-ná koni s'ín sasén-la Nainá

12 ¹ K'oaá ma-ne 'ndsè, nga tse kjohimatakòn tjin-la Nainá xi it'aà tsaján, 'an bitsi'bà-nò nga k'oas'ín tìngatsja yijo-nò it'aà ts'e Nainá koni jngòd kjotjòd xi tijnakon, xi tsjeè tjin, xi ndaà sasén-la Nainá; nga ngui ko inima-nò ko kjohitsjeèn-nò jeya sikkína Nainá. ² Kì k'oas'ín onguíko yijo-nò koni s'ín tjin kjotixoma-la isò'nde. Tixitseyá kjohitsjeèn-nò nga kàtatjia-nò koni s'ín tìtsanjchá yijo-nò mé-ne nga jcha-nò mé xi mejèn-la Nainá it'aà tsajòn, jnà kjoa xi ndaà tjin, xi ngui tjikixi, xi jè ndaà sasén-la.

³ It'aà ts'e xá xi 'an kitjoé kjotjòd-na, k'oaá xan-nò nga jngòd ijngòd, kì 'nga onguíko kjohitsjeèn-nò koni s'ín tjinè-la nga sikkitsjeèn; tà saà ndaà tikitsjeèn koni s'ín ok'in-la kjondaà xi kitsjaà-nò Nainá k'e nga kòkjeiin-nò it'aà ts'e Cristo. ⁴ Koni s'ín tjin yijo-ná nga kjin skoya tjin-la tanga kakj'eíí kakj'eíí xá tjin-la nga ijngòd ijngòd skoya. ⁵ K'oaá s'ín ma it'aà tsaján nga kjin ma-ná, tanga xi it'aà ts'e Cristo tà jngòd ma-ná nga ijngòd ijngoá; k'oaá s'ín kindoba'ñoá xinguiá koni s'ín kitsobà'ño xikjín yijo-ná.

⁶ Koni s'ín kjòmejèn-la Nainá jye kitsjaà-ná xá xi s'eén nga jngòd ijngoá. Jngòd xita, tsà jè xá kitjoé-la nga xita kichjayajìin-la, k'oaá s'ín kàtasíkjeén koni s'ín mokjeiin-la. ⁷ Tsà jè xá kitjoé-la nga xita kosiko, k'oaá s'ín kàtasíkjeén nga ndaà kàtasiko xita. O xi jè xá kitjoé-la nga kòkòya, k'oas'ín kàtasíkjeén nga ndaà kàtakóya. ⁸ Jè xi kitjoé-la xá nga sijehikon xita, k'oas'ín kàtas'ín. Jè xi ma-la sika'bí tsojmì,

ngui koó inima-la kàtasíka'bí; jè xi xá ítjòn kjòngatsja, ndaà kàtasíkitasòn; jè xi síchját'aà-la jñà xita ima, koó kjotsja-la kàtasíchját'aà-la.

⁹Ngui koó inima-nó tìtsjacha xinguiòo. Tìjticha kjoa xi ch'o tjin. Koí tanguftjingui-là kjoa xi ndaà tjin. ¹⁰Koó kjotsja-nò tìtsjacha xinguiòo nga 'ndsè chiba. Ìsa ndaà jchaxkón xita xinguiòo xi l'nga; jñà tìkítsajna ítjòn nga jngoò ìjngoò.

¹¹Kì ts'eè 'nè xi xá ts'e Nainá. Ngui koó inima-nò tixá-là Na'è-ná.

¹²Tsja te-lá takòn jè kjoa xi chiñà-là. Ko inima-nò kàtachíkjoko-nò kjo'in xi tìtsanikjioón. Nachrjein nchijòn tìtsi'ba-là Nainá.

¹³Tji-là mé xi mochjeén-la jñà xita tsjeè-la Cristo. Chjoétjò xita xi bijchó ya ni'ya-nò.

¹⁴Tijét'aà-la Nainá nga kàtasíchikon-t'in jñà xita xi ch'o síko-nò; kì k'oaá s'ín nìjét'aà-là nga kjo'in tsjá-la.

¹⁵Tìtsjakoo jñà xita xi tsja tjin-la. Chìhindáyakoo jñà xi nchikjindáya.

¹⁶Tà jngoò t'een kjohítsjeèn-nò. Kì 'nga ikon 'nè yijo-nò, ya tsjahijtakoo jñà xita ima. Kì 'nó chjine nachrjenguiodè yijo-nò.

¹⁷Jñà xita xi ch'o síko-nò, kì ch'o nikoo ngajo-nò. Kjit'aà nachrjein ndaà t'een nga nguixkon ngats'iì xita. ¹⁸Skanda ñanda sakó'nde-nò, jñò tjinè-nò nga 'nchán tìtsajnakoo ngats'iì xita. ¹⁹Ndí 'ndsè xi matsjake-nò, k'e nga mé xi mat'ioòn, kì jñò 'nè ngajo-nò. Tsja Nainá tìkijnaya kjoa-nò mé-ne nga jè tsjá-ne kjo'in. K'oaá s'ín tíchja Xojon-la Nainá nga tsò: “Tsò Na'è-ná: 'Aán oko-na nga kìndaàjiin-la xita, 'aán tsja-la chjí-la.” ²⁰K'oaá ma-ne, tsà jè kondra-lè, tsà tsjìn tsojmì xi kine, jí tji-la; tsà xíndá-la, tji-la nandá nga kàt'iì. K'e nga koa síkoi, kosobà tì'bi-la kondra-lè, chiba-la kohinì isén-la koni xá'í. ²¹Jè kjoa xi ch'o tjin, kì jè síkijne-nò; tìkioá-ne jè kàtitasòn xi kjondaà, mé-ne nga síkijne-là kjoa xi ch'o tjin.

Mé kjoa-ne nga níkitasòn-lá xi xitaxá tìtsajna

13 ¹Ngats'iì xita kàtasíkitasòn-la xi xitaxá tìtsajna, nga Nainá kitsjaà-la kjotíxoma. Jñà xi xitaxá tìtsajna, Nainá kitsjaà-la xá. ²Jñà xita xi bitsajna tájaà-la kjotíxoma-la xitaxá, kondraá bitsajna-la jñà xita xi Nainá kitsjaà-la xá. Jñà xita koi, tì yijo-laá tìbínè-la kjo'in. ³Jñà xitaxá mìtsà koi

xá títsajna-ne nga jñà kìnchaxkón-la xitá xi ndaà s'ín, jñà-né xitá xi ch'o tjin kjoa xi s'ín. Tsà mejèn-lè nga mìkiù kiskón-la xitaxá, ndaà t'jin, kò jñà xitaxá ndaà sùikjina-lè. ⁴Jñà xi xitaxá tjin-la, xá ts'e Nainá nchisíkitasòn, mé-ne nga ndaà kijna-ne. Tanga tsà ch'o tjin kjoa xi tì'nì, tiskón-la xi xitaxá tjin-la, nga tji'nde-la nga tsjaà-lè kjo'in. Nga xá-la Nainá nchis'ín k'e nga bíndaajin kjoa kò nga tsjá-la kjo'in jñà xitá xi ch'o s'ín. ⁵K'oaá ma-ne nga mochjeén-né nga ndaà sikitason-lá jñà xi xitaxá títsajna, mìtsà tà koi-ne nga kjo'in tsjá-ná; koi-né nga xó k'oas'ín beè-la takoán nga tjinè-ná nga sikitasoán. ⁶Koi' kjoa-la nga tikoa machjí ton sá, nga jñà xitaxá k'oaá s'ín nchisíkitasòn-la Nainá kò kjit'aà nachrjein koatjin xá xi nchis'ín.

⁷Tichjió yije mé xi kitjen-nò. Jè xi kitjen-la ton sá, kàtíchjí. Jè xi kitjen-la tsojmì xi machjítjì, kàtíchjítjì. Jè xitá xi mochjeén-la nga jchaxkón, kàtayaxkón. Jè xitá xi mochjeén-la nga ndaà kijná, ndaà tikijná. ⁸Kì mé xi jmeèt'ioòn yijo-nò. Tanga kitjeén-nò ts'e kjoatjòcha it'aà ts'e xitá xinguiò. Nga jè xi matsjakeè xíkjin, jyeé kisíkitasòn yije Kjotíxoma. ⁹Jñà kjotíxoma tsò-ne: “Kì kjoa chijngui 'nì, kì xitá nìk'in, kì chijé 'nì, kì 'én ndiso nokjoì, kì maxítakòn-chiì xinguii.” Ngats'iì kjotíxoma koi, kò xi kje'íí, yaá mangásòn yije jè kjotíxoma xi tsò: “Títsjachi xitá xinguii koni tsà ti yijo tsiji-ne.” ¹⁰Jè xi matsjakeè xíkjin, mìtsà ch'o síkò xitá xíkjin. Jè xi matsjakeè xíkjin, jyeé ndaà tísíkitasòn Kjotíxoma.

¹¹K'e nga k'oas'ín s'eén yijeé kjoa koi, jcha-ná nachrjein i'ndeì mé kjoa xi tíma nga jye ijchò chiba-la nga sikja-lá yijo-ná nga titsafè. Koni k'e nga sa kòkjeiín-ná, jye 'nó kjòchrañat'aà nachrjein nga kitsajnandiaá kjoa ts'e jé-ná. ¹²Nitjen, jyeé tífahato, jyeé tímachrañà nachrjein nga s'e isén nga kitjojen ijngod k'a Na'è-ná. Kìnachrjenguaiaá ngats'iì kjoa xi ma ñánda nga jñò choòn kò chjoé nga'nó-la Nainá koni s'ín mochjeén ñánda iseèn choòn koni tsà kichá ts'e soldado. ¹³K'oaá s'ín iseèn kitjá koni nachrjein nga ndaà sijchá yijo-ná. Mì kì mochjeén nga taxkì chjineé tsojmì kò nga mach'iaá. Mìkiù mochjeén nga íchjin kjòhijtkoaá, kò mì kì ma taxkì sikoáá yijo-ná. Mìkiù mochjeén nga xitá kixkàn-koaá kò mìkiù mochjeén nga kjoaxitakòn kichjà-lá xinguiá. ¹⁴K'oaá s'ín tijchá yijo-nò koni s'ín kis'iin jè Na'è-ná Jesucristo, kì kiù nìkitasòn-la yijo-nò kjoa ch'o xi sjé.

K'e nga mìkiì mangàsòn kjohítsjeèn-ná
it'aà ts'e kjoa xi mì xó kiì tjí'nde-ná nga s'eén

14 ¹Chjoéjtò xita xinguiqo xi mìkiì tíjngod ikon mé kjoa xi tjí'nde-la nga s'iin; kì chibàya-nò jñà kjoa xi mìkiì mangàsòn kjohítsjeèn-nò. ²Tjín xita xi k'oas'ín mokjeiín-la nga ma chine yije tsojmì xi tjín, tikoá tjín xita xi mìkiì mokjeiín-la tsà ma chine yije tsojmì xi tjín. Tà jñà tsojmì xi nangui síjchá kine. ³Jè xi kine yije tsojmì xi ma chine mìkiì koma kochrjekàngui jè xi mìkiì ma-la kine yije tsojmì; kò jè xi mìkiì ma-la kine yije tsojmì, mìkiì koma kichajno-la jè xi ma-la kine yije tsojmì xi tjín, nga Nainá jyeé kiskoéjtò nga ki'ndí-la ma. ⁴¿Yá-né jì nga nikindjì chi'nda xi mìtsà tsjji? Nga chi'nda ts'e Nainá-né. Jè chi'nda jè, kindà ts'eé nei-la tsà kixi tíjna kò tsà mì kixi tíjna. Tanga kixií kíjna, nga jè Na'èn-ná tjín-la nga'nó nga kixi síkíjna.

⁵Tjín xita xi tsò: tjín nachrjein xi isa xkón. Tikoá tjín xi tsò: Nachrjein, tà ngàsòn ngaya-né nga nachrjein nchijòn. Nga jngod ijngod xita, k'oaá s'ín ndaà katíjngod-la ikon koni s'ín síkítsjeèn. ⁶Jñà xita xi faájiin jngod nachrjein nga beèxkón, k'oaá s'ín nga jeya síkíjna Na'èn-ná; koá jñà xita xi tsò nga ta ngàsòn ngáya nachrjein, tikoáá k'oaá s'ín s'ín nga tikoá jeya síkíjna Na'èn-ná. Jñà xita xi kine yije tsojmì, it'aà ts'e Na'èn-ná kine, nga tsjá-la kjondaà Na'èn-ná k'e nga kine; k'oa jñà xita xi tsò nga tjín tsojmì xi mìkiì ma chine, tikoáá it'aà ts'eé Na'èn-ná nga mìkiì kine tsojmì, kò tikoáá tsjá-la kjondaà Na'èn-ná.

⁷Jñá, k'e nga titsajnakoaán, mìtsà koi xá titsajnakon-ná xi ta kjondaà tsaján. Kò k'e nga kiyá, mìtsà ta kjondaà tsaján kinchátsjiaá nga kiyá. ⁸Tanga k'e nga titsajnakoaán, koií xá titsajnakoaán xi kjondaà ts'e Na'èn-ná. Kò nga kiyá, tikoáá koií xá kiyá-aná xi kjondaà ts'e Na'èn-ná. K'oaá ma-ne tsà titsajnakoaán kò tsà kiyá kjondaà ts'e Na'èn-ná nga ts'e tsò-ná. ⁹Koií kjoa-la nga k'en Cristo koá jaáya-la nga tsibijnakon-né, mé-ne nga jè koma-ne Nei-la jñà xita xi biyà kò xi títsajnakon.

¹⁰Tanga jì xi nokjoájno-la 'ndsi, ¿mé-ne koa'nè-ne? Tikoáá jì xi nachrjekàngui 'ndsi, ¿mé-ne nachrjekàngui-ne? Nga

ngats'iì-ná kijchò kinchanguiaá ndsokò Cristo ñánda nga jè tíhotíxoma. ¹¹K'oaá s'ín tíchja Xojon-la Nainá nga tsò:

Tsò Na'én-ná: 'An tijnakon-ná,
ngats'iì xitá kincha-xkó'nchit'aà-na
kò ngats'iì xitá skoexkón Nainá.

¹²Ngats'iaá k'oi-lá kinda Nainá mé kjoa xi ki'né nga tsitsajnaá isò'nde.

¹³K'oaá ma-ne nga mì tì xinguiáá kinókjoajno-lá; jñò, ta saá ndaà tikítsjeèn nga nimé xi s'een xi sikits'ón-jiin koni s'ín mokjeiín-la xinguiòo mé-ne nga mì jé skajiin ijngod k'a-ne.

¹⁴'An ndaà tijnngod takoàn it'aà ts'e Na'èn-ná Jesús nga kixi kjoa nga tsjin tsojmì xi xkón tjin nga mìkii ma chine; tanga jè xitá xi k'oas'ín síkítsjeèn nga tjin tsojmì xi xkón tjin nga mìkii ma chine, xkón tjin-la it'aà ts'e tsà skine. ¹⁵Tanga tsà ta koií kjoa-la ts'e tsojmì xi chinii, jè 'ndsi ch'o ma-la, jè kjoa xi tì'nì mìtsà tì kjoatjòcha-ne; kì kii biì'ndi nga jè 'ndsi xi Cristo k'en ngajo-la kits'ón-jiin-la xi tà kjoa ts'e tsojmì xi chinii. ¹⁶Kì k'oaá s'ín 'nè mé-ne nga mì xitá kichajno-nò it'aà ts'e kjoa xi titsa'nè nga k'oas'ín mokjeiín-nò nga ndaà tjin. ¹⁷K'e nga jè Nainá tíhotíxoma-ná mìtsà jè xi isa 'ñó hjí-la mé xi s'ioaá kò mé xi chineé. Jè xi 'ñó mochjeén nga kixi kitsajnaá, 'nchán sijchá yijo-ná, kò tsja k'oé-lá inima-ná; koi kjoa xi tsjá Inima Tsjeè-la Nainá. ¹⁸Jè xi k'oas'ín síkitasòn kjoa koi k'e nga síxá-la Cristo, ndaà sasén-la nguixkon Nainá, tikoáá ndaà bijna nga nguixkon xitá.

¹⁹K'oaá s'ín kjitjingui-lá kjoa xi 'nchán síkijna-ná kò kjoa xi 'bi-lá nga'ñó xinguiáá nga jngod jngoáá koni s'ín mokjeiín-ná.

²⁰Kì xá-la Nainá nìkits'ón-jiin-la xi ta kjoa ts'e tsojmì xi ma chine. Kixií kjoa, ngats'iì tsojmì xi tjin, tsjeè-né. Tanga jè xi ch'o tjin k'e nga ta koi kjoa-la tsojmì xi chineé bits'ón-jiin-la kjoa xi mokjeiín-la it'aà ts'e Nainá jñà xitá xi k'jeií. ²¹Isaá ndaà-ne nga mì yijo chjineé, nga mì xán s'ioaá, nga nimé kjoa xi s'een jè xi síkits'ón-jiin-la jè 'ndsi nga sakó-la jé. ²²Koni s'ín mokjeiín-lè it'aà ts'e kjoa koi, tà jii tjiin takoìn kò Nainá. ¡Mé ta ndaà-la jè xi mì kjo'in bínè-la yijo-la k'e nga tijnngod ikon nga ndaà tjin kjoa xi s'ín! ²³Jè xi jò tjin-la k'e nga mé tsojmì xi kine, jé tíhónè-la yijo-la nga mìkii tjijnngod ikon tsojmì xi kine. Tsà mìkii tjijnngod takoán k'e nga mé kjoa xi s'een, jé titsahonè-lá yijo-ná.

15 ¹Jñá xi jye kixi mokjeiín-ná it'aà ts'e kjoa xi tji'nde-ná mé xi s'eén, mochjeén-né nga tikoá kichikjoako-ná jñà xita xi k'oas'ín mokjeiín-la nga mikii tji'nde-la mé kjoa xi s'iin. Mitsà tà jñà kjoa xi ndaà sasén-ná kinchátsjiaá. ²Nga jngod ìjngoáá, mochjeén-né nga k'oas'ín s'eén jè kjoa xi sasén-la jñà xita xinguiáá xi kjondaà ts'e, mé-ne nga kijin-ìsa kjohítsjeèn-la jè kjoa xi mokjeiín-la. ³Nga tikoá jè Cristo mitsà jè tsohótsji kjoa xi sasén-la yijo-la, tà saá it'aà ts'eé tsitasòn koni s'ín tjit'aà xojon ts'e Salmo, nga tsò: "Én ch'o xi ji kiichajno-lè, 'aán kiskaàt'aà-na." ⁴Jñà 'én xi kitjei nga sa kjòtseé, koií xá kitjei-ne nga kokòya-ná mé-ne nga it'aà ts'e Xojon-la Nainá, tseé s'eén takoán tikoá s'e-la kjoa'nchán inima-ná, mé-ne nga koma chíñakjoa-lá it'aà ts'e Nainá. ⁵Nainá xi ma-la tsjá-ná kjoatsetakòn ko xi ma-la sí'nchán-jiin inima-ná, k'oas'ín jngod kjohítsjeèn kàtatsjá-nò nga jngod ìjngoò koni tsò Cristo Jesús, ⁶mé-ne ngats'iodò ngàsòn jngod jta jeya tikíjna Nainá, Na'èn-la Jesucristo xi otixoma-ná.

⁷Koií kjoa-la k'oas'ín choétjò xinguiòo nga jngod ìjngoò koni s'ín kiskoétjò-nò Cristo mé-ne nga jeya kíjna-ne Nainá. ⁸K'oaá xán-nò, jè Cristo Jesús, koií xá j'iì-ne nga j'iì síxájiin-la xita judío xi tjit'aà chiba-la kjoa ts'e circuncisión mé-ne nga tsakó-ne kjoakixi-la Nainá tikoá síkitasòn koni s'ín jye kitsjaà-la tso'ba Nainá jñà xita jchínga kjiin-la. ⁹Tikoáá koií xá j'iì-ne mé-ne nga jñà xi mitsà xita judío jeya siikíjna Nainá it'aà ts'e kjohimatakòn xi tjin-la Nainá koni s'ín tíchja Xojon-la Nainá, nga tsò:

Koií kjoa-la nga jeya siikíjna-lè jjiin-la xita naxandá xi mitsà xita judío.

It'aà tsiji sé-lè sò xi ndaà tsò.

¹⁰Ìjngod k'a tjit'aà xojon ñánda nga tsò:

Jñò xi mitsà xita judío 'mì-nò,
tsjaá t'è-lá takòn ko xita naxandá-la Nainá.

¹¹Ìjngod k'a tjit'aà xojon ñánda tsò:

Jñò ngats'iodò xi mitsà xita judío 'mì-nò,
jeya tikíjna Na'èn-ná,
ngats'iodò xi naxandá 'mì-nò jeya tinachrjeè Nainá.

¹²Ìjngod k'a tjit'aà xojon ts'e Isaiás ñánda tsò:

Jè tje-la Isai kitjot'aà jngod-ne jts'én-la xi kotixoma-la jñà
xi mitsà xita judío,

kò jè jts'én jè kòt'aà ikon nga skõña-kjoa-la.

¹³Nainá xi tsjá nga chiñakjoaá, kàtatsjá yije-nò kjotsja kò kjoa'nchán nga mokjeífn-nò it'aà ts'e, mé-ne nga isa ndaà chíñakjoa isaa xi kò nga'nó-la Inima Tsjeè-la Nainá.

Pablo chi'nda-la Jesucristo

¹⁴Tanga ndí 'ndsè, 'an tíjngòè takoàn xi it'aà tsajòn xi tíjñò-nò tíjn-nò kjondaà tíkoá machiya-nò nga koma tíjñò síkixiya-là xita xinguiòo nga íjngòè jngòè. ¹⁵Ndí 'ndsè, 'nó tíbeè-la takoàn nga tíkjiì-nò xojoñ jè; tíchjà kixi-nò, mé-ne nga mikii jchàajiìn-nò koni tsò xojoñ jè. Koií k'oas'ín tísíkijsjeèn-nò nga 'an kítoé-na kjotjò-la Nainá k'e nga kitsjaà-na xá, ¹⁶mé-ne nga 'an koma-na chi'nda-la Jesucristo it'aà ts'e xi mìtsà xita judío. Sìxákoaa 'én ndaà-la Nainá, mé-ne jñà xi mìtsà xita judío ndaà sasén takòn-nè Nainá koni jngòè kjotjò xi 'nó sasén-la Nainá nga it'aà ts'e Inima Tsjeè-la Nainá jyeé kjòtsjeè.

¹⁷'An tíjn-na mé kjoa-ne nga matsja-na it'aà ts'e Cristo ts'e xá xi tìs'iaàn. ¹⁸Nì mé kjoa tíjn xi ma'nót'aà takoàn nga ma chjà, ta jè kjoa ts'e Cristo nga 'an síkjeén-na nga sìxákoaa jñà xi mìtsà xita judío mé-ne nga koma síkitasòn-la Nainá. K'oaá s'ín kis'iaàn it'aà ts'e 'én xi kichjà kò it'aà ts'e xá xi kis'iaàn, ¹⁹kò it'aà ts'e kjoaxkón xi okó kjoajeya-la Nainá kò it'aà ts'e nga'nó-la Inima Tsjeè-la Nainá. Jyeé ndaà kisingásoàn 'én ndaà-la Nainá xi kjoa ts'e Cristo, tsibìts'iaako-na ján Jerusalén kóhokji nga jngòè itjandii-la skanda ján Ilírico. ²⁰K'oaá s'ín tsibìnè-la yijo-na nga kichjàyè 'én ndaà-la Nainá xi kjoa ts'e Cristo ya i'nde nánnda kj'eè yá bénojmiya it'aà ts'e Cristo, mé-ne nga mì 'an kokodya ndaà-la xita xi kj'eí xi jye tsakóya ítjòn-la it'aà ts'e Cristo. ²¹Koni s'ín tíjt'aà Xojoñ-la Nainá nga tsò:

Skoë-né jñà xita xi mì yá tsibénojmi-la it'aà ts'e;
kochiyaá-la jñà xita xi kj'eè mé 'én 'nchré xi it'aà ts'e.

Kós'ín tísíkijsjeèn Pablo nga mejèn-la kjoí Roma

²²Kò kjìn k'a mejèn-na fikòn-nò tanga jñà xá xi 'an tìs'iaàn i i'nde jé mìkii tjò'nde-na nga ma fia. ²³Tanga i'ndeí nga jye jyehet'aà xá-na ijndé, kò tíkoá kò kjìn nó tíjn-la nga mejèn fikòn-nò, ²⁴k'oaá s'ín tísíkijsjeèn, k'e nga kjían ján España,

k'eé kichjajto-nò mé-ne nga skoexkon-nò. K'e nga jye chibá jngoð tjoà koma kinchako-ná nga koma kjián ñanda nga tífia. ²⁵Tanga i'ndeí ján Jerusalén tífia, nga tífiko jngoð-la nga'ño jñà xita-la Cristo xi ya títsajna. ²⁶Nga jñà xita naxandá-la Nainá xi títsajna Macedonia ko Acaya kjòtsja ts'e-né nga tsibíxkó chiba ton koni jngoð nga'ño xi kjotjò ts'e xita ima naxandá-la Cristo xi títsajna ján Jerusalén. ²⁷Nguí kjòtsja ts'e-né koni s'ín kis'iin jñà xita koi. Nga tjen-t'in-la kjondaà. Tsà jñà xita xi mìtsà xita judío k'oaá s'ín kisakò-la kjondaà ya ijìin inima-la it'aà ts'e xi nguí xita judío, tìkoaá tjinè-la jñà xi mìtsà xita judío nga kinchako nga tsjá-la tsojmi xi mochjeén-la. ²⁸K'e nga jye kjoehet'aà kjoa koi nga jye sìngatsja jè ton xi kjòxkó, ikjoàn skotsejèn jngoð tjò-nò, k'eé kjián ján España. ²⁹Be-ná nga 'ño ndaà sìichikon-t'in-ná Cristo k'e nga kìjchokon-nò.

³⁰Tanga jñò ndí 'ndsè, bitsi'bà-nò it'aà ts'e Na'èn-ná Jesucristo ko it'aà ts'e kjoatjòcha xi tsjá-ná Inima Tsjeè-la Nainá, tìnokjoat'aà-la Nainá xi it'aà ts'an, ³¹mé-ne nga kosìko-na Nainá it'aà ts'e xita xi mìkì mokjeíin-la xi títsajna ján Judea, ko mé-ne nga jè ton xi tífiko-la xita-la Cristo xi títsajna ján Jerusalén ndaà kàtasasén-la, ³²mé-ne nga, tsà k'oas'ín mejèn-la Nainá, nga ko kjòtsja-na kìjchokon-nò, tìkoa koma ndaà sìikjaya chiba nachrjein-ko-nò. ³³Jè Nainá xi tsjá-ná kjoa'nchán kàtijnako-nò ngats'ioð. K'oas'ín kàtama.

**Kós'ín kisìhixat'aà Pablo ngats'iì xita
naxandá-la Nainá xi títsajna Roma**

16 ¹It'aà tsajòn sìngatsja-nò jè tichjaá Febe, jè xi síchját'aà naxandá-la Cristo xi ya tíjna Cencrea; ²ndaà chjoétjò xita jè nga xinguiáá ma nga tìkoaá mokjeíin-la it'aà ts'e Na'èn-ná nga k'oaá s'ín ok'in-la xi xita-la Cristo. Tìchját'aà-la nita mé xi kochjeén-la nga 'ño kjín xita tsasìko, tìkoa 'an kisìchját'aà-na.

³Tìixat'eì jè Priscila ko Aquila, jñà xita xi taña nìxákjòð-jen it'aà ts'e Cristo Jesús. ⁴Jñà xita koi kjomeè kinik'en xi kjoa ts'an. Mìtsà tà 'an xi tsjaà-la kjondaà tìkoa tsjá-la kjondaà ngats'iì xita naxandá-la Cristo xi mìtsà xita judío. ⁵Tìkoa tìixat'eì jñà xita naxandá-la Cristo xi maxkóya ya ni'ya-la Priscila ko Aquila. Tìixat'eì jè Epeneto xi 'ño matsjake nga

jè kòkjeíin ítjòn-la it'aà ts'e Cristo ya i'nde Acaya. ⁶Tiixat'eì jè María, chjōón xi 'nó ndaà kisixá it'aà tsajòn. ⁷Tiixat'eì jè Andrónico kō Junias, xi xinguiáá ma nga taña tsitsajna'ya-jen ndayá. Jñà xita xi tsibíxáya-la Cristo 'nó matsjakeè xita koi. Kō isà ítjòn kijtseèxkon 'én-la Cristo koni 'an.

⁸Tiixat'eì jè Amplias, jè xita xi 'an 'nó matsjake it'aà ts'e Na'è-ná. ⁹Tiixat'eì jè Urbano xi taña síxáko-na it'aà ts'e Cristo Jesús kō jè Estaquis xi 'an 'nó matsjake. ¹⁰Tiixat'eì jè Apeles xi ndaà kixi mokjeíin-la it'aà ts'e Cristo. Tiixat'eì jñà xita xíkjin xi ya títsajna ni'ya-la jè Aristóbulo. ¹¹Tiixat'eì jè Herodión xi xinguiáá ma. Tiixat'eì jñà xita xíkjin xi ya títsajna ni'ya-la Narciso xi Na'è-ná títsajna kō. ¹²Tiixat'eì jè Trifena kō Trifosa jñà íchjin xi 'nó síxá-la Na'è-ná, kō tichjaá Pérsida xi 'nó matsjachaá nga tikoā ndaà síxá-la Nainá. ¹³Tiixat'eì jè Rufo xi xó jaàjìin-ne Nainá. Kō nea-la xi 'an k'oa tís'in beètakoàn koni tsà nea-na. ¹⁴Tiixat'eì jè Asíncrito, jè Flegonte, jè Hermas, jè Patrobas, jè Hermes kō xita 'ndsee xi ya títsajna kō. ¹⁵Tiixat'eì jè Filólogo, jè Julia, jè Nereo kō ndichja, kō Olimpas, ngats'iì xita xi mokjeíin-la it'aà ts'e Cristo xi ya títsajna kō.

¹⁶Jñò nga jngodè ijngodè, k'e nga síxat'aà xinguiōo, ngui kōō inima-nò tiixat'aà xinguiōo nga kō okixi-nò. Ngats'iì xita naxandá-la Cristo xi i títsajna síhixat'aà-nò.

¹⁷Ndí 'ndse k'oaá s'ín bìtsi'bà-nò nga chítsejèn-là jñà xita xi síjòya kō xi síkits'ón-jìin koni s'ín mokjeíin-nò, jñà xi kondra f'iì-la kjohítsjeèn koni s'ín kichità'ya jñò. Tinchat'aàxin-là jñà xita koi. ¹⁸Jñà xita koi, mìtsà Na'è-ná Jesucristo síxá-la, tà yijo-laá síxátjì. 'Èn sin 'én ndaà chja nga konachan-la xita xi mìkii ndaà machiya-la. ¹⁹'An, matsjaá-na it'aà tsajòn nga jye ndaà na'yà-nò nga ndaà nìkitasòn. Tanga 'an mejèn-na nga xita chjìnee kàtama it'aà ts'e kjoa xi ndaà tjín. Kō jñà kjoa xi ch'o tjín, k'j'èè kii na'yà-nò. ²⁰Jè Nainá xi tsjá-ná kjoa'nchán, tà chibaá chija-la nga ya sìkíjnangui ndsokodè jè xita neí mé-ne nga kōma kìnchanè. Kjonda-la Na'è-ná Jesucristo kàtijnako-nò.

²¹Tísíhixat'aà-nò jè Timoteo xi taña nìxákjodè-jen, kō Lucio, kō Jasón kō Sosípater jñà xi xita xinguiāa ma.

²²'An xi Tercio mì-na, xi tikjì-nò xojon jè, it'aà ts'e Na'è-ná, síhixat'aà-nò.

²³Tikoā tísíhixat'aà-nò Gayo; 'an íj tìjnaa i ni'ya-la nga tikoā íj bixoña ngats'iì xitā naxandá-la Cristo. Tísíhixat'aà-nò Erasto xitā xi bítjò ton ts'e ni'ya osen; tikoáá síhixat'aà-nò jè 'ndseé xi 'mì Cuarto.

²⁴Ngats'iodè, jè kàtìjnako-nò kjondaà-la Jesucristo xi otíxoma-ná.

'Én xi fehet'aà-ne

²⁵Jeya kàtìjna jè Nainá xi tìjnako-nò. Jè xi komà tsjá-nò nga'nó tikoā komà kixi sìkítsajna-nò koni tsò 'én ndaà-la Nainá xi 'an okoòya-nò kō jñà 'én xi nokjoàyajìin-nò it'aà ts'e Na'è-n-ná Jesucristo. Nga jyeé tí'ya-la kjoā xi tjí'ma-la Nainá skanda sa kjòtseé; ²⁶tānga i'ndeì jye ki'ya-la koni s'ín tìchja Xojon-la Nainá xi kiskì jñà xitā xi kiìchja ngajo-la Nainá kjòtseé. K'oāá s'ín tìchja kjotíxoma-la Nainá xi tìjna nità mé nàchrjein-nè. Jè kjoā'ma-la Nainá, jye kis'enojmí yije-la ngats'iì xitā naxandá xi tìjn nga tìjtsa isò'nde mé-ne nga kàtasíkitasòn-ne koni s'ín mokjeíin-la.

²⁷Jè Nainá xi tajngoð ma-ne, xi tìjn-la kjoachjine, kàtas'e-la kjoā jeya it'aà ts'e Jesucristo nità mé nàchrjein-ne. K'oas'ín kàtama.